

Maki

Buki ana alamani weaqina

Maki ena 'wayavi ana 'ebeve'ale 'inaya vonaya, “Ba'e Vale Aqiaqina ana 'ebeve'ale Iesu Keliso weaqina, tauna Yaubada Natuna.”

'Inega ba'e ena buki 'inaya Iesu ena viaqa waiwaidi be 'ebenuavoqana weaqidi 'wayavidi, 'idewani ma'oda 'inega Iesu niboana luveifadi luvinedi be 'wavi 'ifoqeyedi tomotau 'idiega. Ta wese ma'oda 'inega Iesu tomotau edi luveifana weaqina nuataqodi ta giveaqiaqiedi. Iesu taunega gabea Tomotau Natuna, ta ena ve'ita 'inega givesimatalia ena mai bwa'obwa'oya weaqina, ta ena mai~nana 'iuna yawaina awafelea tomotau qabudi adi 'etoyavua weaqina. Mana tuta~nana sulalina inoqa 'etoluaia e 'inega tomotau edi luveifana 'idiega 'utu yavulea. 'Inega tomeqabu Iesu ena viaqayavo be wese ena vonayavo ivetumaqanedi taudi luaqiaqiedi be ba'e 'etoyavua~nana ina lobeia.

Maki ena 'wayavi ba'e 'inaya simana taudi Falisiavo be, luvine ana tove'itayavo be, Sadusiavo be, toveguba qidquiduadi be wese 'abaga ana tovanugwetayavo nuanuadi Iesu ina ve'ewei ta ina luve'aligia. Ta ge taha ena luveifamo, ta tua gavana Failato Iesu awafelea 'inega itutuve'ewea 'etoluai 'inaya. Ta Maki Iesu ena ya'itoto 'aligega weaqina wese simana aqiaqiea.

Buki gamona

1:1-13 Iesu Valena Aqiaqina ana 'ebeve'ale

1:14–9:50 Iesu ena viaqayavo tomotau nuanidia di'we Galili 'inaya

10:1-52 Iesu Galili nokea ta tauya Ielusalema weaqina

11:1–15:47 Iesu ena wiki 'ebelu'ovoa Ielusalema 'inaya

16:1-8 Iesu ena ya'itoto 'evivi 'aligega weaqina

16:9-20 Iesu ena 'ifoqe tomotau matadia ta ena vaneqa mahalaya

Ioni Togivebabitaiso ena lugaihi

(Madiu 3:1-12; Luke 3:1-18; Ioni 1:19-28)

1 ¹Ba'e Vale Aqiaqina ana 'ebeve'ale Iesu Keliso weaqina, tauna Yaubada Natuna. ²^a Lova Yaubada ena tovesimasimana Aisea Iesu Valena madu'wayavia vonaya,

^a 1:2 Mal 3:1

“Ba’e egu tovaletuyana
yavetunei nugwenugweta weaqiu
be ’eda naqadalia.
3 ^b Ta di’we ’ava’avaya
bonana qiduanega vegabagaba, vonaya,
‘Kaiwabu ena ’eda ona qadalia
ta ona givetuvetunuqia.’”

4^c ’Inega Ioni Togivebabitaiso ’ifoqe mai di’we ’ava’avana ’inaya ta lugaihi tomotau ’idia vonaya, “Emi ilivu luveifadi ’idiega ona nuagivila ta ’inega ena givebabitaisomi ta Yaubada emi ilivu diavona nanuataqodi.” 5 Ta tomotau Ielusalemega ta wese di’we Iudia ’abaganavo ’idiega iba’auta imai Ioni ena gaihi sabi noqolina. Ta wese edi ilivu luveifadi isimana ’ifoqeyedi, e ’inega givebabitaisodi go’ila Iolidani ’inaya. 6^d Ta Ioni ana kaleko yubai kameli vutuvutudiega, ta ana gadi’wana yubai ’wafidiega, ta ana ’abwagayavo wakifou be wese mu’awa. 7^e Ta Ioni lugaihi vonaya, “Tauna ’abibodaguyega maimai veago va’inegu, ’inega ge daluaqiaqiegu be ’aqenaya ena iwa’odu ta ana ’aqeyafayafa ena li’ami. 8 Ya’a go’ilega yagigivebabitaisomi ta tauna Niboana Gwalagwalanega nagivebabitaisomi.”

Ieisu ena baibitaiso

(Madiu 3:13–14:11; Luke 3:21–22; 4:1–13)

9 Ta omo’e tutana ’inaya Ieisu di’we Galili gamonaya ’abaga Nasaleta nogea ta mai go’ila Iolidani ’inaya, e ’inega Ioni Ieisu givebabitaisoya. 10 Ta Ieisu ni’au go’ilega fweula, ’inega ’ita vane mahala ’itea ’elalamia, ta Niboana Gwalagwalana ana ’ita kavona malasi webui mai ’inaya. 11^f ’Inega taha bona mahalega vonaya, “O’a Natu aqiaqigu yaveloyubeu ta weaqiu yaqaiawa qiduan.”

Seitani Ieisu sitonovia

(Madiu 4:1–11)

12 Ta tuta omo’e ’inaya Yaubada Niboanina Ieisu luvetunea tauya di’we ’ava’ava ’inaya. 13^g Ta ’aubena 40 omo’e ’inaya toatoa, ta ’aubena diavona ’idia Seitani Ieisu sitonovia, ta di’we~nana ’inaya wese yubai sasasadi itoatoa, ta Yaubada ena tovale’ewayavo Ieisu i’itamakia.

Tolu’iqana adi yau foa Ieisu gabedi

(Madiu 4:12–22; Luke 4:14–15; 5:1–11)

14^h Toluvine qiduana Elodi Anitifasi ena luvineyega Ioni ni’a ia’uluguyea vanue ’ebeyoqona ’inaya. ’Inega Ieisu ’evivi tauya di’we

^b 1:3 Ais 40:3 ^c 1:4 Via 13:24; 19:4 ^d 1:6 2Kin 1:8; Md 11:8 ^e 1:7 Via 13:25

^f 1:11 Same 2:7; Ais 42:1; Md 12:18; Mk 9:7 ^g 1:13 Same 91:11–13 ^h 1:14 Mk 6:17

Galili 'inaya ta Vale Aqiaqina Yaubada 'inega lugaihiea, ¹⁵ⁱ vonaya, “Tuta ni'a 'ifoqe, be Yaubada ena 'Ebeluvine ni'a mai di'wedaya. 'Inega emi luveifayavo 'idiega ona nuagivila ta Vale Aqiaqina ona vetumaqanea!”

¹⁶'Inega taha tuta Iesu lavu Galili balabalanega luluvivila, 'inega 'oloto magilafudi Saimoni ma taina Anidulu 'itedi ta edi gomana ibwa'ubwa'uya, mana taudi tolu'iqana. ¹⁷Ta Iesu gabedi vonaya, “Omai, ona 'abibodegu ta ena 'iva'ava'aimi 'inega omi'a tomotau ona 'onedi.” ¹⁸'Inega lukwayavonega edi gomana inogedi ta Iesu i'abibodea. ¹⁹'Inega wese tufwana vanaqo ta Iemesa be Ioni, taudi Sebedi natunavo wagaya itoatoa ta edi gomana i'iva'ava'aidi. ²⁰Ta tuta~nana Iesu 'itedi 'inega wese 'idewani gabedi, ta tamadi me ena tofewayavo wagaya inogedi ta Iesu i'abibodea.

Iesu niboana luveifana 'wavini 'ifoqe taha 'oloto 'inega
(*Luke 4:31-37*)

²¹Iesu ma ana to'abibodayavo imai 'abaga Kafaneumi 'inaya ta Sabatea vanue tafwaloloya Iesu lugu ta ve'ale ve'ita. ^{22j} Ta tomotau qabudi nuadi voqana ena ve'ita weaqina, mana gebu luvine ana tove'itayavo edi ve'ita 'idewani, ta 'esi me ena luvine ta wese me ena waiwai veve'itedi. ²³Ta vanue tafwalolo~nana 'inaya taha 'oloto toatoa, tauna niboana luveifana ni'a luguya, 'inega tuta ba'e 'inaya 'oloto~nana Iesu gabea, ^{24k} vonaya, “Iesu, o'a Nasaleta 'olotou, tola'ai weaqina umai 'imaya? Nuanuau vonigo una fofolima, waisa? Ta ni'a yahalamaniu, o'a Yaubada Natuna Gwalagwalau.”

²⁵Ta Iesu luvinea vonaya, “Eloveu! 'Oloto bena'e 'inega u'ifoqe mai!” ^{26l} 'Inega niboana luveifana 'oloto~nana luvededeli, ta me ena kolua 'oloto~nana 'inega 'ifoqe.

²⁷Ta tomotau qabudi nuadi voqana ta taudiega iveveqae ivonaya, “Ba'e ai ve'ita, mana yani vauvauna ka'itea! Ta 'oloto~nana me ena luvine waiwaina, ta wese niboana luveifadi luvinedi ta ena vona ivematamatayagea.” ^{28m} Ta Iesu ena viaqa valena lukwayavonega yawala dadana di'we Galili 'abaganavo 'idia.

Iesu tomotau qabudi giveaqiaqiedi
(*Madiu 8:14-17; Luke 4:38-41*)

²⁹Iesu ma ana to'abibodayavo vanue tafwaloloyega i'ifoqe, 'inega Saimoni ma taina Anidulu ediavo Iesu be Iemesa ta wese Ioni i'ebe'ewedi itauyedi edi vanuea. ³⁰Ta Saimoni lawana 'wafidi lu'wea'weava ta me edi vihiqa 'ivia i'eno'eno, 'inega Iesu ivematamagilafuyea tovevihiqa~dina weaqidi. ³¹'Inega Iesu lugu 'idia ta nimadia kafi ta siveya'itotodi, ta vavine adi vihiqa awala. Ni'a iveaqiaqi 'inega 'abwaga i'iva'ava'aia Iesu ma enavo weaqidi. ³²Ni'au baba'au lia 'unuva 'inega tomotau edi tovevihiqayavo ta wese tomeqabu niboana luveifadi i'wahalidi maega

ⁱ 1:15 Md 3:2 ^j 1:22 Md 7:28-29 ^k 1:24 Mk 5:7 ^l 1:26 Mk 9:26 ^m 1:28 Md 4:24

imiedi Ieisu 'inaya. ³³ Ta wese 'abaga~nana ana totoayavo qabudi iva'auta imai vanue~nana masu'edaninaya. ³⁴ ⁿ Ta Ieisu tomotau mali vihiqa be mali vihiqa 'idiega giveaiaqiaiedi. Ta wese niboana luveifadi 'wavinidi i'ifoqe ta awatayed i ge ina vevonavonaye i, mana ni'a ialamania tauna Yaubada Natuna.

Ieisu Galili 'abaganavo 'idia lugaihi
(*Luke 4:42-44*)

³⁵ ^o 'Awa'awai otaqa matavelovelovanaya Ieisu ya'itoto ta ana 'aidega vanuega 'ifoqe, ta tauya taha di'we tomotau geqanaya sabi venoqi. ³⁶ 'Inega Saimoni ma enavo wese iwebui, ta Ieisu isalia. ³⁷ Ta tuta~nana ilobea ivoneaya, "Tomotau qabudi isalisaliu!"

³⁸ Ta Ieisu vonedia, "Kana tauya vaina 'abaga di'wedaya, ta 'idia ena lugaihi, mana tauna fewana weaqina yamai." ³⁹ ^p 'Inega Ieisu tauya Galili 'abaganavo 'idia ta edi vanue tafwalolo 'idia lugaihi ta wese niboana luveifadi 'wavinidi i'ifoqe.

Ieisu 'oloto 'wago'wagoina giveaiaqiea
(*Madiu 8:1-4; Luke 5:12-16*)

⁴⁰ Taha 'oloto 'wago'wagoina mai Ieisu 'inaya ta tuqatuqanega sobadi ta venoqi vonaya, "Eguma nuanuau una giveaiaqiegu, mana o'a au fata."

⁴¹ 'Inega Ieisu nuakolokoloyea ta nimana si'otoia ta 'oloto~nana 'wafina gitonovia ta vonaya, "Ao eu nuanua ena viaqia, uvevunavunaqa ta uveaiaqi!" ⁴² Ta 'oloto~nana ana 'wagota lukwayavonega 'evutuqia ta veaiaqi. ⁴³ Ta Ieisu 'oloto~nana luvetunea natauya ta wese luvine waiwaina neia vonaya, ⁴⁴ ^q "Ge taha toga 'inaya una vesimasimanegu, ta 'esi tunutunuqina una tauya toveguba 'inaya ta tau'u una ve'itayeu. 'Inega toveguba~nana na'iteu na'awahaqiaqieu, ta wese mali tomotau ina alamania ni'a uveaiaqi. Ta wese eu guba una 'ewea be una vegubayea Yaubada 'inaya, lova 'idewani ada luvine Mosese 'inega."

⁴⁵ Ta 'oloto~nana Ieisu ena luvine ge da'abibodei, ta 'esi tomotau qabudi 'idia vesimasimanea. Ba'e 'iuna 'inega Ieisu ge ana fata davasimasimatala 'abaga diavona 'idia, ta 'inega tauya di'we tomotau geqana 'idia. Ta tua nawale tomotau imaimai 'inaya 'abaga taha taha 'idiega.

Ieisu 'oloto belubeluna giveaiaqiea
(*Madiu 9:1-8; Luke 5:17-26*)

2 ¹ 'Aubena vaina gumwala 'inega Ieisu 'evivi mai Kafaneumi 'inaya. Ta valena tomotau ni'a inoqolia vanuea toatoa. ² 'Inega tomotau qabudi iva'auta vanue~nana gamonaya ta wese masu'edaninaya, ta Ieisu

ⁿ 1:34 Mk 3:10-12 ^o 1:35 Md 14:23; Mk 6:46 ^p 1:39 Md 4:23; 9:35 ^q 1:44 Luvi 14:1-32

Yaubada ena vona lugaihiea 'idia. ³Ta 'abaga~nana 'inaya taha 'oloto toatoa du'una qabudi belubeluna, ta enavo adi yau foa i'avalei imiea Ieisu 'inaya. ⁴Ta ge adi fata iadi ida luguyei mana qabu qidua va'inedi vanue~nana iluveagatuna'ia. 'Inega i'avalei ivaneqea vanue debanaya 'abo 'ubu iqa'uya ta ma 'ivina wayoyega ivekalilia webui Ieisu 'iawanaya. ⁵Ta Ieisu to'avala~dina edi vetumaqana 'itea, 'inega 'oloto belubelu~nana 'inaya vonaya, "Natugu, eu luveifayavo ni'a yanuataqodi!"

⁶Ta vaina luvine ana tove'itayavo Ieisu di'wenaya itoatoa ena vona inoqolia ta taudiega ivetala'aiedi ivonaya, ⁷"Ma'oda ba'e 'oloto~nana vonavona 'aiqa? Vonahaqiaqi, taunega givaneyea kavona Yaubada 'idewani. Mana Yaubada ana 'aidega otaqa ana fata luveifana nanuataqodi."

⁸Ta Ieisu nuanega edi nuanua ni'a alamania 'inega vonedi vonaya, "Tola'ai weaqina bena'e 'idewani onuanua 'aiqa? ⁹Ta isana ma'oda ena vona 'aiqa 'oloto belubeluna ba'e 'inaya? Nage ena vonaya, 'Eu ilivu luveifana ni'au yanuataqodi', nage ena vonaya, 'Uya'itoto, eu 'ebana u'avala utauya?" ¹⁰Ta nuanuagu ona alamania ya'a Tomotau Natuna me egu luvine waiwaina bwa'obwa'oya, 'inega luaqiaqiegu be tomotau edi ilivu luveifana ena nuataqodi." 'Inega Ieisu belubelu~nana vonea vonaya, ¹¹"Yavoneu, uya'itoto eu 'ebana u'avalei ta utauya eu 'abagaya."

¹²'Inega ya'itoto ta ena 'ebana 'ewei, ta qabu matadiega 'ifoqe tauya. E omo'e 'inaya tomotau qabudi nuadi voqana ta Yaubada iawatuboya ivonaya, "Lova ba'e yanina ge taha tuta kada 'itea."

Ieisu Libai gabea (Madiu 9:9-13; Luke 5:27-32)

¹³'Inega Ieisu 'evivi lavu Galili 'inaya, ta balabalaya toatoa. E 'inega tomotau qabudi imai 'inaya ta itoa vivilia, 'inega ve'ale ve'itedi. ¹⁴Ve'itedi gumwala 'inega tautauya, ta taha takesi ana to'ewa 'itea vanue 'ebefewa 'inaya toatoa. Ana wawa Libai, tauna Alifio natuna, ta Ieisu voneaya, "Umai u'abibodegu!" 'Inega Libai ya'itoto ta Ieisu 'abibodea.

¹⁵Ta tuta~nana Ieisu ma ana to'abibodayavo ilugu Libai ena vanuea sabi 'ai, 'inega takesi ana to'ewayavo 'eala be wese toveilivu veifa maega itoabui ta i'ai, mana ba'e tomotau diavona qabudi Ieisu i'abibodea.

¹⁶^r 'Inega Falisi taudi luvine ana tove'itayavo Ieisu i'itea, 'inega ana to'abibodayavo ivetala'aiedi ivonaya, "Tola'ai weaqina emi tove'ita takesi ana to'ewayavo be wese toluveifadi maega i'ai'ai?"

¹⁷Ta Ieisu edi vona ba'e noqolia 'inega vonedi vonaya, "Taudi aqiaqidi ge nuanuadi togiveaqiaqi, ta 'esi tovevhiqa nuanuadi togiveaqiaqi. Ya'a ge eda mai tunutunuqidi weaqidi ta 'esi yamai toluveifadi sabi iuladi."

Vedede ana vetala'ai weaqina

(Madiu 9:14-17; Luke 5:33-39)

¹⁸ Ioni Togivebabitaiso ana to'abibodayavo ta wese Falisiavo vaina tuta ivedede edi tafwalolo weaqina. 'Inega vaina tomotau imai Ieisu 'inaya ta ivetala'aiea ivonaya, "Tola'ai weaqina o'a au to'abibodayavo ge ida vedede, mana Ioni ana to'abibodayavo ta wese Falisiavo adi to'abibodayavo ivevedede?"

¹⁹ 'Inega Ieisu vona sesebaiega vonedi vonaya, "Tola'ai ana aqiaqi 'eguma vaqi ana toyo'oyavo ina vedede tuta~nana tovaqi me'olotona maega itoatoa? Ge taha wese ana aqiaqi! Mana tauna ma enavo qabudi ina qaiawa. ²⁰ Ta nawale tuta maimai 'inaya tovaqi~nana ina kafia be ina tauyea, 'inega enavo me edi nuavita ina vedede."

²¹ Ta wese vona sesebaiega vonedi vonaya, "Ge ana fata be kaleko vauvauna matavusinega kaleko 'itu'ituwaina kana bwabwadei. Ge daluaqiaqiea, mana nawale kana 'utuya 'inega bwabwada vauvauna nabwagogoma, ta kaleko 'itu'ituwainana ena eabu nagive'ena'ia.

²² Ta wese ge taha toga 'oine vauvauna naiwaqa ukamanei wage 'itu'ituwaina yubai 'wafidiega 'inaya, mana nawale nanabahabuya, e 'inega 'oine~nana ta wese wage~nana ina luveifa. Ta 'esi luaqiaqiea be 'oine vauvauna kana iwaqia wage vauvauna yubai 'wafidiega gamonaya."

Ieisu tauna Sabate ana Kaiwabu

(Madiu 12:1-8; Luke 6:1-5)

²³ Sabate taha 'inaya Ieisu ma ana to'abibodayavo vaoqa gamonega itautauya ta witi vuaqina ma walona i'egigoluya ta i'ai'ai. ²⁴ ^s Ta Falisi i'itedi 'inega Ieisu ivonea ivonaya, "Tola'ai weaqina au to'abibodayavo ifewafewa ta Sabate ana luvine iludewa kavokavovoyei?"

²⁵ ^t 'Inega Ieisu ve'iedi vonaya, "Nage ge oda avoi Buki Nugwenugweina 'inaya tola'ai Deibida ma enavo iviaqia tuta~nana botana gegoyo ilutonovia? ²⁶ ^u Yaubada ena vanuea lugu ta beledi gwalagwalana 'ewei 'abo 'ai. Ta beledi~nana ma ana luvine toveguba dimo adi luaqiaqi be ina 'ainia. Ta tua mana ibotana, 'inega Deibida beledi~nana 'ewei ta wese enavo neidi 'abo i'ai. Ta ba'e yani~nana iviaqia lova toveguba edi tovanugweta Abiata ena tutaya."

²⁷ ^v 'Inega Ieisu vonedi vonaya, "Yaubada Sabate viaqia tomotau weaqidi, ta tomotau ge daviaqidi Sabate weaqina. ²⁸ Ta yavona aqiaqiemi, ya'a Tomotau Natuna yani qabuna yaluviluvinedi, ta wese ya'a Sabate ana Kaiwabu."

^s 2:24 Luve 23:25 ^t 2:25 1Sam 21:1-6 ^u 2:26 Luvi 24:5-9 ^v 2:27 Luve 5:14

Ieisu 'oloto nimana belubeluna giveaiaqiea
(Madiu 12:9-14; Luke 6:6-11)

3 ¹Ta 'inega wese Ieisu 'evivi mai vanue tafwalolo 'inaya, ta 'oloto taha nimana belubeluna 'itea toatoa. ²Ta Falisi vaina Ieisu ivevekovea 'eguma ba'e 'oloto~nana nagiveaiaqiea Sabatea, be 'inega ina ve'ewei ta ina kafia. ³'Inega Ieisu 'oloto~nana vonea vonaya, "Umai ba'idia, ta tomotau matadia utovolo!"

⁴"'Inega Ieisu Falisi vetala'aiedi vonaya, "Toyani luaqiaqieda be kana viaqi Sabatea? Nage yani aqiaqina kana viaqi, nage luveifana kana viaqi? Nage tomotau kana 'etoyavuidi, nage kana luve'aligidi?" Ta Ieisu ena vona ba'e ge ida ve'iea.

⁵'Inega Ieisu me ena gamosoala 'ita givila ta 'ita makimakidi, ta wese nuana vita edi vedeba 'i'wana weaqina. 'Inega 'oloto~nana voneaya, "Nimau usi'otoi!" 'Inega nimana si'otoia ta veaqiaqi 'evivi. ⁶^x 'Inega Falisiavo i'ifoqe itauya toluline qiduana Elodi ena tomotauyavo 'idia, ta adi 'aidega idima govaqa ma'oda Ieisu ina luve'aliga 'aiqei.

Tomotau qabudi iva'auta lavu Galili 'inaya

⁷'Inega Ieisu nogedi ta ma ana to'abibodayavo itauya lavu 'inaya, ta qabu qiduana Galili 'inega itala'obea. ⁸Ta wese vaina qabu Ieisu ena viaqayavo valena inoqolia, 'inega Iudia be, Ielusalema be, Idumea be Iolidani di'wenavo 'idiega ta wese Taia be Saidoni 'abaganavo 'idiega iva'auta imai. ⁹⁻¹⁰ Ta Ieisu ana to'abibodayavo vonedi waga taha goyona ina miea weaqina, mana tovevihuqa qabudi ni'a giveaiaqiedi, 'inega wese vaidi tovevihuqa ivevetunuefaefala nuanuadi Ieisu ina gitonovia. ¹¹^z Ta tuta~nana tomotau diavona niboana luveifadi ni'au i'wahalidi Ieisu i'itea 'inega matanaya igivelukabwebwe ta ikolua ivonaya, "O'a Yaubada Natuna."

¹²^a 'Inega Ieisu niboana luveifadi luvine waiwaina neidi vonaya, "Ge tomotau 'idia ona vevonavonayegu ya'a togama!"

Ieisu ena tovaletuyana adi yau Tuwelo venua'ivinedi
(Madiu 10:1-4; Luke 6:12-16)

¹³⁻¹⁴ Ta 'abibodanaya Ieisu 'watovu taha bwanaga 'inaya, ta ena nuenuega tomotau gabedi ta imai 'inaya. Ta tomotau diavona 'idiega Ieisu 'oloto adi yau tuwelo venua'ivinedi, ta vonedi vonaya, "Omi'a tuwelo mina yavenua'ivinemi egu tovaletuyanayavo, ta omi'a be ya'a maega kana toa, ta 'abiboda ena vetunemi tomotau 'idia ona lugaihi. ¹⁵ Ta egu waiwai ena neimi 'inega ami fata niboana luveifadi tomotau 'idiega ona 'wavinidi ina 'ifoqe." ¹⁶^b Tuwelo diavona adi wawayavo ba'e: Saimoni (tauna Ieisu gabea

^w 3:4 Lk 14:3 ^x 3:6 Md 22:15-16 ^y 3:9-10 Md 14:36 ^z 3:11 Lk 4:41 ^a 3:12 Mk 1:34

^b 3:16 Ion 1:42

Fita), ^{17c} ta wese Iemesa ma taina Ioni, taudi Sebedi natunavo ta Ieisu gabedi Bonagesi (ta wawa~nana ana alamani yavalata natunavo), ¹⁸ ta wese Anidulu be, Filifi be, Batolomio be, Madiu be, Tomasi ta wese taha Iemesa, tauna Alifio natuna, ta wese Tadiasi be, Saimoni tauna Seloti edi qabu gamonega, ¹⁹ ta wese Iudasa Isakaliota, tauna Ieisu ana tosuluva.

Ieisu ta Belisibubi

(Madiu 12:22-32; Luke 11:14-23; 12:10)

²⁰ 'Inega Ieisu 'evivi mai ena 'abagaya, ta qabu qiduna iva'auta 'inaya, e 'inega ge ana fata ma ana to'abibodayavo ida 'ai. ²¹ Ta tuta~nana Ieisu ena susuyavo valena inoqolia ena fewa 'inega ge daveyawaia, 'inega imai sabi 'ebe'ewana ta taudiega ivonaya, "Ni'au vekwavakwava."

^{22 d} Ta luvine ana tove'itayavo Ielusalemega iwebui mai ivonaya, "Belisibubi tauna niboana luveifadi adi tovanugweta. Ta Belisibubi~nana ni'a Ieisu luguya, ta ena waiwaiega niboana luveifadi 'wavi'wavi 'ifoqeyedi."

²³ 'Inega Ieisu tomotau qabudi gabedi imai ta vona sesebaiega vonedi vonaya, "Seitani ge ana fata Seitani na'wavi 'ifoqeyei." ²⁴ Ta wese vonaya, "Eguma 'ebeluvine taha 'inaya tomotau ina vetoatoasi'i, 'inega nawale 'ebeluvine~nana nadawalili ta nabe'u. ²⁵ Ta wese 'eguma susu taha nuanidia vetoatoasi'i na'ifoqe e nawale edi toa naluveifa otaqa. ²⁶ Seitani wese 'idewana, 'eguma ma enavo taudiega ina vedavi 'inega edi toa naluveifa ta wese ena 'ebeluvine nahawala."

²⁷ Wese vona sesebaiega Ieisu vonedi vonaya, "Vonahaqiaqi, ge taha toga ana fata taha 'oloto waiwaina ena vanuea nalugu ta ena kulufa navanawalidi. Ta 'eguma tovanawala taha nuanuana nalugu, e 'inega nugweta tovewaiwai~nana nimana be wese 'aqena nayoqonidi, 'inega ana fata vanue~nana 'inaya nalugu ta kulufa qabuna navanawalidi. ²⁸ Ta yavona aqiaqiemi, tomotau edi luveifana ta wese edi vona veifa qabuna Yaubada nanuataqodi, ²⁹ ta 'eguma taha toga Niboana Gwalagwalana na'awaluveifea 'inega Yaubada ge ana fata tomotau~nana nanuataqoi, ta 'esi ena luveifana na'eno vataya."

³⁰ Ba'e 'idewana Ieisu vona 'aiqa mana luvine ana tove'itayavo ivonaya, "Niboana luveifana ni'a lugu Ieisu 'inaya, e 'inega ena waiwaiega fewafewa."

Ieisu inana ta tainavo imai 'inaya

(Madiu 12:46-50; Luke 8:19-21)

^{31 e} 'Inega Ieisu inana ta wese tainavo imai ta vanue masu'edaninaya itovolo, 'inega vale ivetunei 'inaya be vanuega na'ifoqe mai ina veqae.

^c 3:17 Lk 9:54 ^d 3:22 Md 9:34; 10:25 ^e 3:31 Mk 6:3; Ion 2:12; Via 1:14

³²Ta tomotau qabudi Ieisu itoa vivilia vale~nana inoqolia 'inega ivoneaya, "Tove'ita, inau be taimwavo isalisaliu."

³³'Inega Ieisu vonedi vonaya, "Togama inagu ta tomeqabu taigwavo?"

³⁴'Inega Ieisu qabu~dina itoa vivilia 'ita makimakidi ta vonedi vonaya, "Omi'a taumi inagwavo ta taigwavo. ³⁵Mana tomeqabu Tamagu ena nuanua i'abi'abibodea e taudi taigwavo be, novugwavo ta wese inagwavo."

Vona sesebai vewana ana toveyavula weaqina

(Madiu 13:1-9; Luke 8:4-8)

4 ^{1f} Ieisu 'evivi mai lavu Galili balabalanaya ta wese ve'ale ve'ita. Ta tomotau qabudi iva'auta imai 'inaya, e 'inega Ieisu wagaya gelu ta tufwana talatete, ta tomotau qabudi nawale balabalaya itovotovolo. ^{2s} Ta Ieisu qabu~dina vona sesebai 'inega yani 'eala weaqidi ve'itedi, ta ve'ita diavona 'idiega taha yani weaqina vonedi vonaya, ³"Ovineneqa! Toveyavula taha tauya ena vaoqaya witi vewanina sabi veyavulina.

⁴Ta tuta~nana veyavuledi 'inega vaina vewana iavuta 'edabalaya, ta manuqa i'itedi iwebui ta i'ai 'ovoidi. ⁵Ta vaina iavuta bwa'o dabodabona 'inaya, ta 'inega itabo kwayavona mana bwa'obwa'o yalayalana. ⁶Ta tuta~nana baba'au vanemai 'inega guvekwavuwidi, mana kwalamidi ge ida webui bwa'obwa'o gamonaya. ⁷Ta wese vaina vewana talitali gamonaya iavuta ta maega itabo vefofo, 'inega witi ge adi fata ida vuaqa, mana talitali~nana vewaiwai ta fai ve'aligidi. ⁸Ta vaina vewana bwa'obwa'o aqiaqinaya iavuta itabo ta ivuaqa, 'inega vewana diavona 'idiega vaina ivuaqa ³⁰ 'idewani, ta vaina 60, ta wese vaina 100."

⁹'Inega Ieisu vonedi, "Eguma ma teniqami vona ba'e ona noqolia."

Vona sesebai ena 'ifoqe 'iuna

(Madiu 13:10-17; Luke 8:9-10)

¹⁰Ta ena ve'ita~nana 'abibodanaya Ieisu ana 'aidega toatoa, 'inega Tuwelo~dina ta wese vaina tomotau maega iva'auta Ieisu 'inaya ta ivetala'aiea vona sesebai adi alamani weaqina. ¹¹Ta Ieisu vonaya, "Omi'a Yaubada ena 'Ebeluvine gamona ana alamani aqiaqi ni'au neimi. Ta tomotau qabudi gebu, 'inega yani qabuna vona sesebaiega yavonevoned, ^{12h} ta lova tovesimasimana Aisea ba'e qabu diavona weaqidi madusimana vonaya,

'Egu vona inoqonoqolia
ta nuadi ge da'eqa'ui,
ta wese egu viaqayavo i'ite'itedi

^f 4:1 Mk 3:7-9; Lk 5:1-3 ^s 4:2 Md 13:34; Mk 4:33-34 ^h 4:12 Ais 6:9-10; Via 28:26-27

ta ana alamani ge ida lobei.
 Mana 'eguma ida alamania
 'inega edi luveifayavo 'idiega
 ida nuagivila be
 'inega Yaubada danuataqodi.' ”

Toveyavula vona sesebaina ana alamani weaqina
(Madiu 13:18-23; Luke 8:11-15)

¹³ 'Inega Ieisu vetala'aiedi vonaya, “Nage egu vona sesebai ba'e ge oda nua'eqa'ui? Be ma'oda 'inega vona sesebai gabudi ona alamani 'aiqedi? ¹⁴ Ta ena givesimatalia 'imia, e ba'e: Tovaoqa~nana tauna Yaubada ena vona ana toveyavula. ¹⁵ Vaina tomotau Yaubada ena vona inoqolia, 'inega Seitani mai ta 'idiega vona diavona 'ewa yavuledi, mana ba'e tomotau diavona kavona vewani~dina iavuta 'edabala 'inaya. ¹⁶⁻¹⁷ Ta vaina tomotau Yaubada ena vona inoqolia, ta me edi qaiawa iawafeledi Vale nana 'inaya. Ta vona diavona ge dalugu aqiaqi 'idia, 'inega tuta kukusana namo 'idia 'enova, mana tuta~nana vita nage vevoalana ina lobeia vona diavona weaqina, e 'inega edi vetumaqana lukwayavonega ina nogea, mana ba'e tomotau diavona kavona vewani~dina iavuta bwa'obwa'o yalayalana 'inaya. ¹⁸ Ta vaina tomotau Yaubada ena vona inoqolia, ^{19ⁱ} ta kulufa kaikaiwabudi be wese bwa'obwa'o ana nuanuayavo nuadi 'ewea ta vona diavona inuafania 'inega ge adi fata ina vuaqa, mana ba'e tomotau diavona kavona vewana talitali gamonaya iavuta. ²⁰ Ta 'esi vaina tomotau Yaubada ena vona inoqolia ta i'awahaqiaqiea, 'inega vaina ivuaqa ³⁰ 'idewani, ta vaina ⁶⁰, ta wese vaina ¹⁰⁰, mana taudi kavona vewana diavona iavuta bwa'obwa'o aqiaqina 'inaya.”

Vona sesebai lamufa weaqina
(Luke 8:16-18)

^{21^j} Ta Ieisu wese vonedi vonaya, “Lamufa kana gabuya, ta gebu 'ulenega kana talakabubui nage 'ivi 'ayanaya kana a'ukwaivei. Ta 'esi luaqiaqiea kana a'uvaneqea 'ebea'u debanaya be 'inega vanue gamona nasimatala. ^{22^k} Yani qabuna 'wai'waividi nawale ina 'ifoqe vunavunaqaya. Ta wese yani qabuna bwabwahadi nawale ina 'ifoqe 'atamanaya. ²³ 'Eguma ma teniqami vona ba'e ona noqolia!”

^{24^l} Ta wese vonedia, “Tola'ai ni'a onoqolia ona nuave'avina aqiaqiea. Ta 'eguma Yaubada ena vona ona noqola aqiaqiea, e 'inega Yaubada ena vona ona alamania, ta ba'e alamani~nana nagiveqiduea. ^{25^m} Mana 'eguma taha toga ena alamani qiduana Yaubada ena vona weaqina, e nawale Yaubada wese nagiveqiduea 'inaya. Ta 'eguma taha toga Yaubada ena

ⁱ 4:19 Md 19:23-24 ^j 4:21 Md 5:15; Lk 11:33 ^k 4:22 Md 10:26; Lk 12:2 ^l 4:24 Md 7:2
^m 4:25 Md 13:12; 25:29; Lk 19:26

vona ge nanoqola aqiaqiea, e nawale ena alamani goyona wese Yaubada na'ewa yavulea 'inega."

Vona sesebai vewana tabotabona weaqina

²⁶'Inega Iesu vonedi vonaya, "Yaubada ena 'Ebeluvine kavonaya taha 'oloto witi vewanina veyavuledi talaqaya. ²⁷Ta mali fewa be mali fewa vesitaqoya 'inega 'evisa 'aubena 'abibodanaya vewana diavona 'itedi ni'a i'elutabo, ta 'oloto~nana ge taha yani daviaqia edi tabo weaqina, ta tua taudiega itabotabo, ²⁸mana bwa'obwa'o taunega witi~nana vevevuaqia. Nugweta tolobwana naha'uuya, ta 'abiboda lovena nasiveyavula, be 'ebelu'ovoa witi walona naludiditanaha. ²⁹" Ta tuta~nana witi na'wauqia 'inega 'oloto~nana ena naifiega nabolimanidi, mana bolimana ana tuta ni'a 'ifoqe."

Vewana goyona ena veago vona sesebaina

(Madiu 13:31-32,34; Luke 13:18-19)

³⁰Iesu wese vonedi vonaya, "Ma'oda 'inega Yaubada ena 'Ebeluvine ena givesimatala 'aiqei 'imia? ³¹Nage ba'e 'idewana ena vetalatutula 'aiqea: Yaubada ena 'Ebeluvine kavona te'wa vewanina, mana vewani~nana yani goyona. ³²Ta 'eguma kana 'wadia e 'abiboda natabo ta yani qabuna vaoqaya itabotabo naveqidua va'inedi. Ta wese nalaqa, 'inega manu ina va'auta ta ina nevuqa 'inaya."

Iesu tomotau tuta qabuna vona sesebaiega ve'itedi

³³Iesu ena lugaihi tomotau 'idia tuta qabuna vona sesebai 'inega veve'itedi. Ta Iesu edi alamani ana fata 'inega veve'itedi. ³⁴Vonahaqiaqi, ge taha tuta mali ve'ita 'inega dave'itedi. Ta 'abiboda 'eguma Iesu ma ana to'abibodayavo adi 'aidega itoatoa 'inega vona sesebai qabuna gigivesimatalia 'idia.

Iesu yaqina be nufula givedaumwalia

(Madiu 8:23-27; Luke 8:22-25)

³⁵Ta ni'a velavilaviea 'inega Iesu wagega ena lugaihi lu'ovoa, ta ana to'abibodayavo vonedi vonaya, "Omai ogelu, kana vaukamana lavu di'wenaya." ³⁶'Inega igelu ta tomotau qabudi balabalaya inogedi, ta wese vaina tomotau me edi waga maega itauya. ³⁷'Inega yaqina waiwaina ve'ale, ta nufula qiduana waga gamonaya goi 'ebo'ebodea, 'abo tuta goyona ida damana. ³⁸Ta Iesu waga yiqunaya ana kunukana ni'a a'ui ta 'eno motaiva. 'Inega to'abiboda~dina idivanoya ivoneaya, "Kaiwabu, nage ge uda nuanua weaqida, mana tuta goyona kana damana!"

ⁿ 4:29 Ioe 3:13; Ve 14:15

39'Inega Ieisu tovololo ta yaqina be nufula lugwaeyedi vonaya, "Elovemi!" Tuata yaqina be nufula 'egwaedi ta daumwala 'ifoqe.

40'Inega ana to'abibodayavo vonedi vonaya, "Tola'ai weaqina omwanimwaniniva? Ana 'ita nawale ge oda vetumaqanegu?"

41Ta to'abiboda~dina imwaniniva qiduana ta taudi 'idia ivonaya, "To'oloto ba'ena, mana yani qabuna ena vona imatayagea, ta wese yaqina be nufula bonana ivematamatayagea?"

Ieisu niboana luveifadi 'wavi 'ifoqeyedi

(Madiu 8:28-34; Luke 8:26-39)

5 1'Inega Ieisu ma ana to'abibodayavo lavu mali di'wenega ivaukamana ta me Gelasine edi di'we 'inaya ilugu. 2Ta omo'e 'inaya taha 'oloto niboana luveifadi ni'a i'wahalia deba'unuya toatoa. Ta tuta~nana Ieisu wagega webui, 'inega 'oloto nana deba'unuyega 'ifoqe mai 'inaya. 3Tomotau tuta qabuna 'aqena be nimana seniega iyoqoyoqonidi, 4ta tua 'e'eluhufeufedi, 'inega ge taha toga ana fata nakafia be nayoqona 'eviviei. 5'Aubena wese velovelovana 'idia yabayaba bwanagaya ta wese deba'unuya ta tuta qabuna vevekolukolua ta ginausega taunega luluda'ea.

6Ieisu nawale luluvaiega maimai 'inega 'oloto~nana 'ita naqo 'itea. 'Inega vihila tauya ta Ieisu 'iawanaya tuqatuqanega sobadi ta iwa'odu. 7-8 7'Inega Ieisu vonea vonaya, "Niboana luveifau, 'oloto ba'e 'inega u'ifoqe!" Ta niboana luveifana bonana qiduanega vonaya, "Ei Ieisu, o'a Yaubada Toatoa Vanena Natuna, tola'ai nuanuau una viaqi 'iguya? Ta Yaubada ana wawega una vona fofofola 'iguya gebu una luvematasabugu."

9'Inega Ieisu niboana luveifana vetala'aiea vonaya, "Ma'oda au wawa?" E tauna vonaya, "Agu wawa 'Ea'ealima, mana 'oloto ba'e gamonaya qabuma atoatoa. 10Ta wese avevenoqieu ge una 'wavi 'ifoqeyema ba'e di'we~nana 'inega."

11Ta omo'e bwanaga lilivanaya bawe qabudi iduaduala. 12'Inega niboana luveifa~dina inoqi Ieisu 'inaya ivonaya, "Una vetunema be ana lugu omo'e bawe 'idia!" 13'Inega Ieisu awafeledi ta niboani~dina 'oloto~nana 'inega i'ifoqe, e bawe 'idia ilugu. 'Inega bawe~dina qabudi ivihila itauya ta dabega ibe'u iwebui lavuya idamana. Ta bawe~dina adi yau 'idewani 2,000.

14Ta bawe adi to'itamakiavo idena itauya 'abaga qiduiduadi be goyogoyodi 'idia, ta tola'ai ni'a i'itea isimana 'ifoqe tomotau qabudi 'idia. 'Inega totoa 'abaga~dina imai nuanuadi matadiega ina 'itea tola'ai 'ifoqe. 15Imai Ieisu 'inaya ta 'oloto~nana lova niboana luveluveifadi iluvekwavea i'itea ta imwaniniva, mana aqiaqina toatoa ta ni'a vekaleko, be wese

'unu'ununa veaqiaqi. ¹⁶'Inega taudi yani qabuna ni'a i'itea matadiega e isimana tomotau 'idia ma'oda 'oloto~nana veaqiaqi 'aiqa, ta wese bawe weaqidi isimana ma'oda iveilaqe 'aiqa. ¹⁷'Inega totoa 'abaga Ieisu ivonea ivonaya, "Nuanuama una tauya ta ema 'abaga una nogea!"

¹⁸Tutana Ieisu wagaya gelu, 'inega 'oloto~nana lova niboana i'wahalia mai Ieisu 'inaya venoqiea vonaya, "Kaiwabu, ya'a nuanuagu o'a maega kana tauya."

¹⁹'Inega Ieisu voneaya, "Ge ana fata, ta 'esi una 'evivi una tauya eu gadeavo 'idia. Ta ma'oda Yaubada ena nuakolokoloyega giveaqiaqi 'aiqeu una simanea 'idia, ta ina noqolia." ²⁰'Inega 'oloto~nana tauya Dikafoli 'abaganavo 'idia ta Ieisu ena viaqa waiwaina tauna 'inaya weaqina simanaye, e tomotau qabudi inoqolia 'inega nuadi voqana.

Ieisu vivine magilafudi giveaqiaqiedi

(Madiu 9:18-26; Luke 8:40-56)

²¹Ta Ieisu ma ana to'abibodayavo ivaukamana 'evivi lavu Galili di'wenaya. Omo'e 'inaya qabu qiduadi iva'auta balabalaya ta Ieisu itoa vivilia. ²²'Inega taha 'oloto ana wawa Yailo, tauna vanue tafwalolo ana tovanugweta, mai Ieisu 'inaya ta 'iawanaya iwa'odu, ²³ta noqinoqi waiwai vonaya, "Kaiwabu, natugu mevavinena goyona nawale yawaina nagumwala, 'inega nuanuagu una mai ta nimaueyega una gitonovia 'inega naveaqiaqi be mayawaina natoatoa."

²⁴'Inega Ieisu ya'itoto ta toluvine~nana maega itutuvila itauya, ta tomotau qabudi i'abi'abibodea ta ivevetunuefala 'edaya. ²⁵Ta qabu diavona gamodia taha vavine ma ana vihiqa sulalina inoinoqa ya'wala tuwelo 'idia, ta nawale inoinoqa ge dalua'u. ²⁶Tuta qabuna tauya togweli qabudi 'idia, ta ena kulufa 'idia vegumwalia ta ge daveaqiaqi, ta 'esi ana vihiqa ve'ena'i. ²⁷⁻²⁸Tutana vavine~nana Ieisu valena noqolia qabu maega itautauya, 'inega vavine~nana Ieisu 'abibodanega maimai ta ena nuanua gamonaya vonaya, "Eguma Ieisu ana kwakwalufai ena gitonoviamo 'inega ena veaqiaqi." 'Inega mai Ieisu gwavunaya ta ana kwakwalufai gitonovia. ²⁹Ta tuta~nana gitonovia 'inega sulalina yafaha kwayavonia ta lutionovia ni'a veaqiaqi.

³⁰^p Ni'au Ieisu lutionovia ena waiwai 'ifoqe, 'inega tunugivila vetala'aiedi vonaya, "Togama gitonovigu?"

³¹'Inega ana to'abibodayavo ivonaya, "Kaiwabu, tola'ai weaqina uvetala'ai togama au kaleko gitonovi, ta ge uda 'itedi tomotau qabudi ivatafutafufuda."

³²Ta Ieisu nawale 'ita givigivila tomotau nuanidia nuanuana na'itea togama gitonovi. ³³Ta vavine~nana ni'a alamania tola'ai 'ifoqe 'inaya,

'inega mai Ieisu 'inaya ta 'aqenaya iwa'odu. Ta me ena mwaniniva tatava, ta yani qabuna weaqina simana aqiaqiea 'inaya. ^{34 q} Ta Ieisu vonaya, "Natugu, eu vetumaqana 'inega ni'a uveaqiaqi. Uya'itoto, ge una nuanua mana au vihiqa ni'a awala."

³⁵ Ieisu nawale vonavona, 'inega Yailo tauna vanue tafwalolo ana tovanugweta ena vanuega vaina tomotau i'ifoqe imai ta ivoneaya, "Natuhu yawaina ni'a gumwala, 'inega Tove'ita ge una ve'aqe visiqi."

³⁶ Ta Ieisu wese valena noqolia ta Yailo vonea vonaya, "Ge giwaliu naha'ala, ta 'esi una vetumaqanamo."

³⁷ Inega Ieisu qabu awatayedi ge ina tala'obei, ta to'abiboda toidi maega itautauya, taudi Fita be Iemesa ma taina Ioni. ³⁸ Itautauya ta Yailo ena vanuea i'ifoqe 'inega to'ewabamu be wese todou bonadi 'ena'ina inoqolia. ³⁹ Inega Ieisu lugu e vonedia, "Tola'ai weaqina odoudou ta ovevekolukolua? Gwama ba'e ge da'aliga ta 'esi 'eno motaiva 'eno'eno." ⁴⁰ Ta todou Ieisu idagea.

'Inega Ieisu 'wavinidi i'ifoqe, ta gwama tamana be inana ta wese ana to'abibodayavo toidi Ieisu maega ilugu gwama ana 'ivia. ^{41 r} Ta Ieisu gwama nimanaya kafi e vonaya, "Talita koum!" (Ana alamani "Todi uya'itoto!") ⁴² Ba'e gwama~nana ni'au ya'wala tuwelo lobe. Ta tuta~nana Ieisu divanoya 'inega lukwayavonega tovolu ta yaba dadana. Tamana be inana ta wese ana to'abibodayavo nuadi voqana aqiaqi. ⁴³ Inega Ieisu awatayedi vonaya, "Ge taha toga 'inaya ona simanayegu egu viaqa ba'e weaqina, ta ana 'abwaga ona neia na'ai."

Me Nasaleta Ieisu inogea

(Madiu 13:53-58; Luke 4:16-30)

6 ¹ Ieisu Yailo ena vanue nogea, 'inega ma ana to'abibodayavo itauya ena 'abagaya. ^{2 s} Omo'e 'inaya itoatoa ta 'aubena Sabate i'ifoqe. 'Inega lugu vanue tafwaloloya ta ve'ale ve'ita, e tomotau qabudi inoqolia nuadi voqana, 'inega ivonaya, "Oloto ba'e, to'edega ena alamani lobei ta wese ena viaqa waiwaidi 'ebenuavoqana tola'aiega 'ewei?" ³ Ta wese ivonaya, "Oloto ba'e, tauna to'eyoqona, waisa? Ta inana Meli be tainavo Iemesa be Iosefa be Iudasa ta wese Saimoni. Ta wese novunavo maega katoatoa, waisa?" 'Inega tomotau Ieisu inogea.

^{4 t} 'Inega Ieisu vonedi vonaya, "Tovesimasimanayavo adi 'amayaba ilobelobea mali 'abagega, ta edi 'abagayavo ta wese edi gadeavo 'idiega ge taha 'amayaba ida lobe." ⁵⁻⁶ Ta Ieisu nuana voqana mana tomotau ge ida vetumaqanea. 'Inega ge ana fata viaqa 'ebenuavoqana 'eala daviaqidi, ta tovevihiqa 'evisa dimo gitonovidi ta giveaqiaqiedi. 'Inega Ieisu luvivila 'abaga taha taha 'idia ta veve'ita.

^q 5:34 Mk 10:52; Lk 7:50; 17:19 ^r 5:41 Lk 7:14 ^s 6:2 Ion 7:15 ^t 6:4 Ion 4:44

Ieisu Tuwelo dina vetune 'ifoqeyedi

(Madiu 10:5-15; Luke 9:1-6)

⁷Ieisu Tuwelo~dina gaba va'auqidi, 'inega lualua vetunedi ina luvivila 'abaga taha taha 'idia. Ta ena luvine be wese ena waiwai neidi, 'inega adi fata niboana luveifadi tomotau 'idiega ina 'wavi 'ifoqeyedi. ⁸⁻⁹^u 'Inega Ieisu lu'aqetutudi vonaya, "Ge taha tola'ai ona 'ewei emi luvivila weaqina. Ge 'abwaga, ge kode, ge ami kaleko vemagilafuna, ta wese ge mane. Ta emi kewala namo nimamia ta wese ami 'aqeyafayafa ona ve'aqe." ¹⁰'Inega wese vonedi vonaya, "Eguma ina gabemi taha vanue 'inaya ona lugu, e 'inega vanue nana 'inaya ona toatoa ana laba 'abaga~nana ona nogea. ¹¹^v Ta 'eguma 'abaga vaina 'inaya ona 'ifoqe ta totoa 'abaga ge ina 'ebe'ewemi ina tauyemi edi vanuea, ta wese 'eguma ge nuanuadi ina vineneqemi, e 'inega 'aqemiega fwayafwaya ona vavutuvutuqia, ta ona nogedi. Ba'e 'inega ona ve'itedi nawale vita na'ifoqe 'idia."

¹²'Inega ana to'abibodayavo iluvivila 'abaga qabudi 'idia ta tomotau ilugaihidi be edi ilivu luveifana ina nogedi ta ina nuagivila. ¹³^w Ta niboana luveifadi 'eala tomotau 'idiega i'wavi 'ifoqeyedi, ta wese tovevihiqa qabudi dede'wega 'wafidi i'e'abi'abia ta iveaqiaqi.

Ioni Togivebabitaio ena 'aliga

(Madiu 14:1-12; Luke 9:7-9)

¹⁴Vonahaqiaqi, lova Elodi taunega luvine a'uya ta Ioni ikafia ia'uluguyea vanue 'ebeyoqona 'inaya. Ta Ioni ana kafi 'iuna taha vavine adi wawa Elodiasa. Taudi Elodi tuana Filifi moqanena, ta Elodi luabuyedi ta vaqidi. ¹⁵^x 'Inega Ioni Elodi vonea vonaya, "Bena'e ilivu ge aqiaqina, mana tuau moqanena uvaqidi, 'inega luvine ubwegea." ¹⁶Ta Ioni ena lugaihi 'inega vavine dina diadi vilea nuanuadi ina luve'aligia. Ta ge adi fata, ¹⁷mana Elodi Ioni 'amayabea ena ilivu gwalagwalana be tunutunuqina weaqina. Ta wese alamania tauna Yaubada ena tofewa taha. 'Inega Elodi Ioni tufwana mwaninivea ta vabodebodea. Elodi nuanuana Ioni ena lugaihi nanoqolia, ta weaqina giwalina a'ala.

¹⁸'Inega Elodi ena 'aubena vi'oi ana nuave'avina 'ifoqe. Ta Elodiasa 'aubenana 'inaya 'eda ni'au inua'eqa'uya ma'oda 'inega Ioni ina luve'aligi. Ta 'aubena nana weaqina 'abwaga 'ena'ina i'iva'ava'aia. 'Inega Elodi ena tomotauyavo 'idewani toluvineavo be toluavia adi tovamatanayavo ta wese Galili 'abaganavo ana kaiwabuyavo gabedi imai. ¹⁹Tuta nana Elodi totoa va'auta maega i'ai'ai, 'inega Elodiasa natudi mevavinena lugu mai matadia tovolu, ta ouyega gigiveqaiawedi. 'Inega Elodi iahaba nana vonea vonaya, "Eguma taha yani nuanuau ta weaqina una noqiegu, e ena neiu."

^u 6:8-9 Lk 10:4-11 ^v 6:11 Via 13:51 ^w 6:13 Iem 5:14 ^x 6:15 Luvi 18:16

20^y Inega vona fofofola ta wese Tamada 'inanea vonaya, "Vonahaqiaqi, tola'ai weaqina una noqi 'iguya ena neiu, ta wese ana fata egu 'ebeluvine di'wena ena da'ei ena neiu!"

21^y Inega iahaba nana 'ifoqe tauya inana 'idia ta vetala'aiedi vonaya, "Inagu, toyani weaqina ena noqi Elodi 'inaya?"

Ta inana ivonaya, "Elodi una voneaya, 'Nuanuagu Ioni Togivebabitaiso 'unu'ununa una neigu.' "

22^y Inega iahabana lukwayavoni 'evivi Elodi 'inaya ta vonaya, "Nuanuagu ba'itaga Ioni Togivebabitaiso 'unu'ununa gaeba 'inaya una dodoi una neigu."

23^y Inega Elodi nuana vita aqiaqi ta ge ana fata nanoga mana ni'au Tamada 'inanea totoa va'auta matadia. 24^y Inega Elodi toluavia taha luvetunei natauya vanue 'ebeyoqona 'inaya, ta luvine neia be Ioni 'unu'ununa namiea. 'Inega 'oloto nana tauya ta Ioni magana da'ea, 25^y ta 'unu'ununa gaebaya dodoi ta 'avalei miea 'abo iahaba nana neia. 'Ewei tauya ta inana neidi. 26^y Ta Ioni ana to'abibodayavo ena 'aliga valena inoqolia, 'inega imai ta Ioni 'wafina i'ewei e itavunia.

27^y Ta Iesu ena viaqa waiwaidi valena tomotau iyavula dadanea di'we qabuna 'idia, ta Elodi wese vale nana noqolia. Ta vaina tomotau ivonaya, "Ioni Togivebabitaiso 'aligega ni'a ya'itoto 'evivi, ta ba'e 'inega ana fata yani diavona 'ebenua voqana wese viaviaqidi."

28^y Ta vaina ivonaya, "Tauna Ilaitia."

Ta wese vaina tomotau ivonaya, "Tauna tovesimasimana taha kavona lova tovesimasimana nugwenugweidi 'idewana."

29^y Ta tuta nana Elodi mali vona be mali vona tomotau 'idiega noqolia 'inega vonaya, "Lova Ioni Togivebabitaiso yaluve'aligia, ta ni'a 'aligega ya'itoto 'evivi."

Qabu qiduadi Iesu ve'ainidi

(Madiu 14:13-21; Luke 9:10-17; Ioni 6:1-14)

30^y Tovaletuyana dina ni'au i'evivi mai Iesu 'inaya ta itoa vivilia. 'Inega edi fewa be wese edi ve'ita weaqina isimana 'inaya. 31^y Ta tomotau qabudi tuta qabuna imaimai 'evi'evivi. 'Inega Iesu me ena tovaletuyanayavo ge adi fata ida veyawai ta ida 'ai. 'Inega Iesu vonedi vonaya, "Omai 'iguya, be kana tauya di'we taha tomotau geqana 'inaya, ta omo'e 'inaya ada 'aidega kana veyawai." 32^y Inega taha waga 'inaya igelu sabi tauya di'we tomotau geqana 'inaya. 33^y Ta tuta nana italatete malavetaya tomotau 'eala i'ita 'inatedi. 'Inega qabudi ta wese 'abaga taha taha 'idiega tomotau 'aqediega ivihilamo imadu'ifoqe. 34^z Tuta nana Iesu wagega vawebui balabalaya 'inega qabu qidua va'inedi 'ita nuaduyedi, mana taudi kavona

^y 6:30 Lk 10:17 ^z 6:34 Naba 27:17; Md 9:36

sifi luluve'waividi ge adi to'itamakimo. Ta 'inega ve'ale ve'itedi yani 'eala weaqidi.

35 ^a Ta ni'a lulaviea 'inega Ieisu ana to'abibodayavo imai ivoneaya, "Kaiwabu, di'we ba'ena tomatou geqana ta baba'au ni'au lialia 'unuva. 36 'Inega tomatou qabudi una vetunedi ina 'evivi ina tauya 'abaga vaina di'wedaya, ta taudiega adi 'abwaga ina sali ta ina gimwane."

37 'Inega Ieisu vona 'eviviedi vonaya, "Omi'a 'abwaga ona neidi ina 'ai!" 'Inega Ieisu ive'iea ivonaya, "Ge ama fata tomatou qabudi adi 'abwaga ana gimwanei, mana ana ve'ia qidua va'inena. Ta 'esi 'eguma mane qiduaana 'imaya da'eno'eno kavona 'oloto adi yau 8 edi fewa wai'ena 'aidegana weaqina ana ve'ia, e 'inega ba'e tobotana dina adi 'abwaga ama fata ada gimwane."

38 'Inega Ieisu vetala'aiedi vonaya, "Beledi 'evisa 'imia? Otauya o'elo'ita."

Ta ni'a ilobea 'inega ivoneaya, "Beledi nima 'aidegana ta wese 'iqana magilafudi."

39 'Inega Ieisu ana to'abibodayavo vonedi tomatou qabudi ina luvinedi be ina toabui libia guguna 'inega. 40 Ta vaina guguna itoava'auta 'idewana 100, ta vaina 50. 41 'Inega Ieisu beledi nima 'aidegana ta 'iqana magilafudi 'ewedi ta 'ita vane mahalaya 'inega lukaiwa ta beledi gitomwedi. 'Inega ana to'abibodayavo neidi, ta ivewila'ayea ma 'iqanina tomatou qabudi 'idia. 42 'Inega qabudi i'ai ta gamodi 'elukoko. 43 Ta to'abiboda dina beledi be 'iqana 'awagigidi iva'auqidi ta 'onena adi yau tuwelo iluveagatuna'idi. 44 Ta to'ai diavona 'idiega 'oloto dimo adi yau 5,000 'idewani.

Ieisu tautauya lavu debanega
(Madiu 14:22-33; Ioni 6:15-21)

45 Ta ge tuta kuena 'abibodanaya Ieisu ana to'abibodayavo lubibinedi vonaya, "Wagaya ona gelu be ona nugweta ona vaukamana mali di'wea Bedesaida 'inaya. Ta ya'a tomatou qabudi ena vematamagilafuyedi be ina ve'iyavula edi 'abagayavo 'idia." 46 ^b 'Inega igelu ta Ieisu qabu diavona luvetunedi iyavula, ta 'abiboda 'watovu bwanagaya sabi venoqi. 47 Ta ni'a velovanea 'inega ana to'abibodayavo nawale lavu malavetanaya wagaya itautauya, ta tauna ana 'aidega nawale oade bwanagaya toatoa. 48 'Inega Ieisu 'itedi inevaneva ta ge adi fata ina vihila, mana yaqina 'au'ia'iawedi. 'Inega manu 'a'alaya Ieisu lavu debanega maimai 'idia tuta goyona nanogedi. 49 ^c Ta tuta nana Ieisu i'itea 'inega ivonaya be otala. 'Inega imwaniniva ta idiula, 50 ta Ieisu lukwayavoni vonedia, "Elovemi, ya'a ba'e taugu emi Kaiwabu, 'inega ge ona mwaniniva!" 51 ^d 'Inega Ieisu wagaya gelu 'abo yaqina lua'u. Ta to'abiboda dina nuadi voqana qiduaana,

^a 6:35-44 Mk 8:1-9 ^b 6:46 Lk 5:16 ^c 6:49 Lk 24:37 ^d 6:51 Mk 4:39

⁵²mana nawale nuadi ge da'eqa'uya Ieisu ena fewa waiwaina weaqina tuta nana tomotau qabudi ve'ainidi beledi nima 'aidegana 'inega, mana edi vetumaqana goyona ta wese debadi 'i'wanina.

Ieisu toveviihiqa qabudi giveaiaqiedi Genasaleta 'inaya

(Madiu 14:34-36)

⁵³'Inega ivaukamana lavu di'wenaya 'abaga Genasaleta 'inaya, ta waga iluifwea. ⁵⁴Ta tutana ivawebui totoa 'abaga Ieisu i'inanea. ⁵⁵'Inega tomotau diavona ivihila itauya 'abaga qabuna 'idia, ta Ieisu Valena isimanayea tomotau 'idia ma'inaya totoa. 'Inega toveviihiqa qabudi ma 'ividi i'avaledi itauyedi Ieisu 'inaya. ⁵⁶Ta Ieisu luvivila di'we taha taha 'idia, 'abaga qiduquduadi be 'abaga goyogoyodi, ta wese vaoqaya. Ta toveviihiqayavo imiedi 'ebetoava'auta 'idia, ta ivenoqi 'inaya 'eguma ana fata ana kwakwalufai matavusinamo ida gitonovia. 'Inega Ieisu awafela 'idia, ta aiqabu gitonovia e iveaiaqi.

Me Diu tubudiavo edi ilivu weaqina

(Madiu 15:1-9)

7 ¹'Abiboda Falisiavo ta wese luvine ana tove'itayavo maega imai Ielusalemega, ta Ieisu 'inaya iva'auta itoa vivilia. ²^e Ta Ieisu ana to'abibodayavo i'itedi i'ai'ai, 'inega diadi vilea mana nimadi ge ida 'utudi. ³(Falisiavo ta wese me Diu qabudi tubudiavo edi ilivu ikafikafia. 'Inega ge taha toga ana fata na'ai 'eguma nimana ge ana 'utumo. ⁴^f Ta 'eguma 'abaga 'ebegimwane 'inega ina mai, e nugweta ina uweta 'inega ina 'ai. Ta wese luvine qabuna tubudiavo 'idiega gaeba be vedi be wese 'ulena adi 'utu weaqina i'abi'abibodedi.) ⁵'Inega Falisiavo be luvine ana tove'itayavo Ieisu ivetala'aiea ivonaya, "Tola'ai weaqina au to'abibodayavo tubudavo edi ilivu ge ida 'amayabedi, mana nimadi bwavubwavuna ta i'ai'ai?"

⁶^g 'Inega Ieisu vona 'eviviedi vonaya,

"Omi'a toveameahaqila!

Lova tovesimasimana Aisea

weaqimi maduvona fofofolayea

tuta~nana Yaubada ena vona 'wayavia,

ta ba'e 'idewana vonaya,

'Tomotau ba'e 'awadiega i'amayabegu,

ta giwalidiega itoa luluvai 'iguyega.

⁷Ta wese 'iguya ihiwaiwa'odu kavokavovo,

mana edi ve'ita luvineavo weaqina

tomotau edi nuenuega,

ta ge ya'a 'iguyega.' "

^e 7:2 Lk 11:38 ^f 7:4 Md 23:25 ^g 7:6-7 Ais 29:13

⁸Inega Ieisu vonedi vonaya, “Vonahaqiaqi, omi’a Yaubada ena luvineavo ge oda ’abibodedi, mana tubumiavo edi ilivu nawale okafi’i’ihia.”

⁹Ta wese vonedi vonaya, “Vonigo onuaia omi’a toalamani aqiaqi, ta gebu! Mana Yaubada ena luvineavo onogenogedi, ta ’esi tubumiavo edi ilivu o’abi’abibodedi. ¹⁰^h Lova Mosesa Yaubada ena luvine simanea vonaya, ‘Tamau wese inau una ’amayabedi.’ Ta wese vonaya, “Eguma togama tamana wese inana navona ve’alatedi e luaqiaqiea be na’aliga.’ ¹¹Ta omi’a ovonaya vonigo taha toga tamana be inana ana fata navonedi navonaya, ‘Soli qiduana, ya’a egu kulufayavo ni’au yahawafeledi Yaubada ’inaya, ’inega ge agu fata ena iulemi.’ ¹²Ta ba’e vona~nana ’inega tomotau adi iula tamadiavo be inadiavo ’idia oawahawatayedi. ¹³Yavona aqiaqiemi, tubumiavo edi ilivu ba’e ’inega ta wese emi ve’ita qabudi ’idiega Yaubada ena vona olukavokavovoya.”

Toyani ana fata tomotau nagivebwavudi Yaubada ’iawanaya
(Madiu 15:10-20)

¹⁴Inega wese Ieisu tomotau qabudi gabedi imai ’inega vonedi vonaya, “Qabumi egu vona ba’e ona noqolia ta ona nua’eqa’uya! ¹⁵ⁱ Tola’ai ka’ai’ainia ge ana fata nagivebwavuda. Ta ’esi tola’ai ’awadega ’ifo’ifoqe mai e ana fata nagivebwavuda.” ¹⁶[“Eguma ma teniqami vona ba’e ona noqolia!”]

¹⁷Inega Ieisu qabu qiduadi nogedi ta ma ana to’abibodayavo ilugu taha vanue ’inaya, e ’inega ivetala’aiea ena vona~nana tomotau ’idia ana alamani weaqina. ¹⁸Inega Ieisu vonedi vonaya, “Nage omi’a wese nuami nawale ge da’eqa’uya? Ta ona alamani aqiaqiea tola’ai ka’ai’ainia lugulugu gamodaya ge ana fata nagivebwavuda. ¹⁹Mana ’abwaga ge dalugulugu giwalidaya, ta ’esi tautauya gamodaya, ’inega ’abiboda tautauya avuqainaya.” (Ena ve’ita ba’e ’inega Ieisu givesimatalia ’idia ’abwaga qabuna vunavunaqidi.)

²⁰Ta Ieisu wese vonedi vonaya, “Tola’ai ’ifo’ifoqe tomotau eda nuenuega e ana fata nagivebwavuda, ²¹’edewani nuanua luveifadi be, velamo’eno kavokavovo be, vanawala be, luve’aliga be, ²²luabu be, vemanuguba be, nuanua kavokavovo be, vediavilavila be, u’ava be, ve’ifi’ifi be, vemwakoloai be, gagasa be, vegila ta wese vaina ilivu kavokavovo. ²³Ba’e ilivu diavona luveifadi i’ifo’ifoqe tomotau edi nuenuega ta gigivebwavudi Yaubada matanaya.”

Vavine taha edi vetumaqana Ieisu ’inaya
(Madiu 15:21-28)

²⁴Inega Ieisu di’we Galili nokea ta tauya Taia ’abaganavo ’idia. Ta taha vanue ’inaya lugu, mana ge nuanuana taha toga ena mai weaqina

^h 7:10 Ifo 20:12; 21:17; Luve 5:16 ⁱ 7:15 Via 10:14-15

nahalamaniana. Ta ge ana fata naoukwaiva mana valena tomotau ni'a inoqolia. ²⁵⁻²⁶ 'Inega wese taha vavine Ieisu ena mai valena inoqolia. Taudi ge Diu vavinedi, ta lova ivi'oi 'abaga Finisia 'inaya di'we Silia gamonaya. Ta natudi goyona mevavinena niboana luveifana ni'a 'wahalia, 'inega inana imai Ieisu 'inaya ta 'aqenaya igivelukabwebwe. Ta ivenoqiea niboana luveifana na'wavi 'ifoqeyea natudi 'inega. ²⁷ 'Inega Ieisu vonedi vonaya, "Nugweta egu tomotauyavo me Diu ena iuledi. Ta ge daluaqiaqiea be gogama adi 'abwaga ena 'ewei 'idiega ena felei kedewa 'idia ta ina 'aini."

²⁸ 'Inega vavine~dina ivona 'eviviea ivonaya, "Kaiwabu vonahaqiaqi, ta kedewa tuta qabuna 'ebe'ai 'ayanaya gogama adi 'abwaga salimuguna 'inega i'ai'ai."

²⁹ 'Inega Ieisu vonedi vonaya, "Emi vona vonahaqiaqi, 'inega ona 'evivi ona tauya ta niboana luveifana natumi 'inega ni'a 'ifoqe ta veaqiaqi."

³⁰ 'Inega iya'itoto itauya edi vanuea ta natudi i'itea 'ivia 'eno'eno. Ta niboana luveifana ni'a dena tauya.

Ieisu taha 'oloto nakunakuna giveaqiaqiea

³¹ 'Inega Ieisu Taia nogea ta tauya Saidoni 'inaya, 'inega 'evivi tauya lavu Galili ta vaikamana di'we Dikafoli 'abaganavo 'idia. ³² 'Inega vaina tomotau taha 'oloto imiea Ieisu 'inaya. Ta 'olotona teniqana kwavana ta wese ge ana fata navona. 'Inega Ieisu ivenoqiea be nagitonovia. ³³ Ta Ieisu tovenakunakuna qabu 'idiega 'ebe'ewei ta magilafudi ivaduma adi 'aidega. 'Inega Ieisu nimanoyana 'oloto~nana teniqanaya a'uluguyea. E 'abiboda wese nimana gida'wei ta tovenakunaku~nana meana gitonovia. ³⁴ Gumwala, 'inega Ieisu 'ita vane mahalaya yawaina lihia ta vonaya, "Efata!" (Ta vona~nana ana givila "Eqa'uhu!")

³⁵ Ta tuta~nana 'inaya 'oloto~nana teniqana 'eqa'uuya ta noqola aqiaqi, ta wese meana ni'a tunuqa be ana fata naveqae. ³⁶ 'Inega Ieisu tomotau qabudi awatayedidi ge taha toga navevonavonayei. Ta awataya~nana inoqolia ta ge ida 'abibodei, 'inega ivesimasimana dadanea tomotau 'idia. ³⁷ Ta tomotau qabudi nuadi voqana aqiaqi, 'inega ivonaya, "Ieisu ena viaqayavo aqiaqi otaqidi ta 'ebenuavoqana, mana teniqadi kwavana vona inoqonoqolia, ta wese taudi ge adi fata ina veqae meadi giveaqiaqiedi 'inega iveveqae."

Ieisu qabu qiduadi ve'ainidi

(Madiu 15:32-39)

8 ¹ Tuta omo'e 'inaya wese taha qabu qiduadi iva'auta Ieisu 'inaya, ta ge adi 'abwagamo. 'Inega ana to'abibodayavo gabedi imai ta

^j 7:36 Mk 1:43-45 ^k 7:37 Ais 35:5 ^l 8:1-9 Mk 6:35-44

vonedi vonaya, ²“Tomotau ba’ena yanuakolokoloyedi, mana ’aubena toi ba’idia maega katoatoa, ta adi ’abwaga ni’au gumwala. ³’Inega ’eguma ma botanidi ena vetunedini ina ’evivi nawale ’edaya ina tafefwai, mana vaina ’idiega luluvaiega imai.”

⁴Ta ana to’abibodayavo ivonea ivonaya, “Di’we ba’ena tomotau geqana ta ma’oda qabu qiduana ba’e adi ’abwaga kana loba ’aiqei?”

⁵’Inega Iesu vetala’aiedi vonaya, “Evisa ami beledi ’eno’eno?”

Ta ivoneaya, “Ana yau seveni.”

⁶’Inega Iesu qabu luvinedi be bwa’obwa’oya itoabui. ’Inega beledi seveni~dina ’ewedi vona lukaiwa Yaubada ’inaya. ’Inega gitomwedi ta ana to’abibodayavo neidi ta ivewila’ayedi qabu ’idia. ⁷Ta wese vaina ’iqana goyogoyodi ’eno’eno, ’inega ’ewedi be weaqidi vona lukaiwa ta ana to’abibodayavo neidi, e ’inega ivewila’ayedi tomotau qabudi ’idia. ⁸’Inega qabu diavona i’ai ta gamodi ’elukoko. Ta ’abiboda to’abiboda~dina ’abwaga ’awagigidi iva’auqia e ’onena adi yau seveni iluveagatuna’idi. ⁹Ta to’ai diavona ’idiega ’oloto dimo adi yau ’idewani 4,000. ’Inega Iesu qabu vetune ’eviviedi itauya, ¹⁰ta ma ana to’abibodayavo taha waga igeluya, ta itauya di’we Dalamanuta ’inaya.

Falisi nuanuadi ’ebe’ita waiwaina ina ’itea

(Madiu 12:38-42; 16:1-4)

¹¹’Inega Falisi imai Iesu ’inaya maega ive’ae’aetoga ta nuanuadi ina sitonovia. ’Inega iluvetuvetunea vonigo taha ’ebe’ita naviaqia ’idia ina ’itea ’inega ina alamania Yaubada ’inega ena waiwai ’ifoqe. ¹²^m ’Inega Iesu nuana vita vonedi vonaya, “Tola’ai weaqina lagata omi’a ba’e nuanuami ’ebe’ita taha ena viaqi ’imia? Yavona aqiaqiemi, ge taha ’ebe’ita ena neimi ona ’itei.” ¹³’Inega nogedi ta wagaya gelu ’evivi, e ma ana to’abibodayavo italatalaukamana lavu mali di’wenaya.

Iesu ena vona sesebai Falisiavo be wese Elodi weaqidi

(Madiu 16:5-12)

¹⁴Ta Iesu ana to’abibodayavo adi ’abwaga ge ida ’ewei mana nuadi fani, ta beledi ’aideganamo waga gamonaya ’eno’eno. ¹⁵ⁿ ’Inega Iesu vona sesebaiega vematamagilafu waiwaina neidi vonaya, “Falisiavo be Elodi adi beledi ana ’ebegiveago isiti ’inega ona ’itamakimi!”

¹⁶’Inega to’abiboda~dina taudiega iveqae ivonaya, “Nage Iesu ba’e ’idewani vona ’aiqa, mana ada beledi kanuafania?”

¹⁷^o Ta Iesu edi nuagovaqa ni’a alamania ’inega vonedi vonaya, “Tola’ai weaqina taumiega oveveqae vonigo ge ami beledimo? Beledi weaqina ya’a ge eda vonavona. Nage nawale nuami ge dasimatala, waisa? ¹⁸Omi’a

^m 8:12 Md 12:39; Lk 11:29 ⁿ 8:15 Lk 12:1 ^o 8:17 Mk 6:52

ma matami ta ge oda 'ita'ita, ta wese ma teniqami ta ge oda noqonoqoli! Nage ni'a ovenuafania egu viaqayavo tuta~nana qabu qiduadi beledi 'inega yave'ainidi, waisa? ^{19p} Taha tuta 'inaya beledi nima 'aidegina 'inega tomotau 5,000 yave'ainidi, ta 'awagigidi 'onena 'evisa oluveagatuna'idi?"

'Inega ivoneaya, "Tuwelo."

²⁰ Ta wese Ieisu vetala'aiedi vonaya, "Ta wese taha tuta 'inaya beledi seveni 'inega tomotau 4,000 yave'ainidi, ta 'awagigidi 'onena 'evisa oluveagatuna'idi?"

Ta ivoneaya, "Ana yau seveni."

²¹ 'Inega Ieisu vonedi vonaya, "Vonahaqiaqi, omi'a nuami nawale ge da'eqa'uya, waisa?"

Ieisu matakwaya taha giveaqiaqiea Bedesaida 'inaya

²² Ieisu ma ana to'abibodayavo imai ilugu Bedesaida 'inaya. 'Inega vaina tomotau taha 'oloto matana kwayakwayana i'ebe'ewei imiea Ieisu 'inaya, ta inoqiea vonigo dagitonovia. ²³ Ta Ieisu matakwaya~nana nimanaya kafi 'inega i'ifoqe itauya 'abaga nanavinaya. 'Inega Ieisu 'oloto~nana matana gida'wea ta nimanega matana gitonovia, e 'inega voneaya, "Au fata una 'ita nage gebu?"

²⁴ 'Inega 'oloto~nana 'ita givigivila ta vonaya, "Tomotau ya'itedi iyabayaba ta adi 'ita kavona 'aiwe."

²⁵ 'Inega Ieisu 'oloto~nana matana gitonova 'eviviea, ta 'inega matana 'eaea ta yani qabuna 'ita aqiaqiedi. ²⁶ 'Inega Ieisu voneaya, "Una tauya eu vanuea, ta tauya~nana 'inaya ge wese una lugu 'abaga gamonega!"

Fita ena simana Ieisu weaqina

(Madiu 16:13-20; Luke 9:18-21)

²⁷ Ieisu ma ana to'abibodayavo iluvivila Sisalia Filifai 'abaganavo 'idia. Ta 'edaya vetala'aiedi vonaya, "Ma'oda tomotau edi vona weaqigu vonigo ya'a toga?"

²⁸ ^q 'Inega to'abiboda~dina ivoneaya, "Tomotau vaina ivonaya o'a Ioni Togivebabitaio. Ta vaina ivonaya o'a Ilaitia. Ta wese vaina ivonaya o'a tovesimasimana nugwenugweidi taha 'idiega."

²⁹ ^r 'Inega wese Ieisu vetala'aiedi vonaya, "Ta omi'a ma'oda emi nuanua vonigo ya'a toga?"

'Inega Fita vona 'eviviea vonaya, "O'a Keliso To'etoyavua."

³⁰ ^s 'Inega Ieisu ana to'abibodayavo luvine waiwaina neidi vonedi vonaya, "Ge taha tomeqabu 'idia ona vevonavonayegu!"

Ieisu simanea ena 'aliga weaqina

(Madiu 16:21-28; Luke 9:22-27)

³¹ 'Inega Ieisu ana to'abibodayavo ve'ale ve'itedi vonedia, "Ya'a Tomotau Natuna nawale visiqa agona ena lobe. Mana nawale 'abaga

^p 8:19 Mk 6:41-44 ^q 8:28 Mk 6:15 ^r 8:29 Ion 6:68-69 ^s 8:30 Mk 9:9

ana tovanugwetayavo be toveguba qiduqiduadi ta wese luvine ana tove'itayavo ina ve'ineiegu toluvine 'idia be ina luve'aligigu. Ta 'aubena toi 'abibodanaya ena ya'itoto 'evivi.” ³² Iesu ena vona ba'e 'inega simana 'ifoqe aqiaqiea ena 'aliga weaqina. 'Inega Fita Iesu 'ebe'ewei maega ivanaqo tufinaya ta awatayea vonaya, “Iesu, ba'e yani diavona ge wese na'ifoqe 'iuya.”

³³ 'Inega Iesu tunugivila ta ana to'abibodayavo 'itedi, ta Iesu Fita lugwaeyea voneaya, “O'a 'idewani Seitani, 'inega unogegu! Eu nuanua kavona tomotau edi nuanua, ta ge Yaubada ena nuanua 'idewani.”

³⁴ ^t 'Inega Iesu tomotau qabudi wese ana to'abibodayavo maega gabedi imai e vonedi vonaya, “Eguma taha toga nuanuana be na'abibodegu, luaqiaqiea tauna ena nuanua nanogedi 'inega taunega ana 'etoluai na'avalea ta na'abibodegu. ³⁵ 'Inega togama yawaina navegagalea e nawale yawaina naluve'waivia, ta togama yawaina nahawafelea weaigigu ta wese Valegu weaqina nawale yawai aqiaqina nalobea. ³⁶ Eguma taha toga bwa'obwa'o ana kulufa kaikaiwabuna qabudi na'ewedi ta 'abiboda na'aliga, tola'ai ana aqiaqina? Gebu'e otaqa! ³⁷ Mana ge taha toga ana fata taha yani 'inega yawaina na'ewa 'eviviei. ³⁸ ^u Ba'itagana ana tomotauyavo Yaubada ilugwavu'aiea ta wese ilivu lueifana tuta qabuna iviaviaqidi. 'Inega 'eguma taha toga weaigigu ta wese egu ve'ita weaqina nainiyauyau ta navegeqegu tomotau matadia, e nawale ya'a Tomotau Natuna wese tomotau~nana ena vegeqea tuta~nana Tamagu ena simatala aqiaqi otaqina 'inega ena 'evivi ena mai Yaubada ena tovale'ewa gwalagwaladi maega.”

9 ¹ ^v Ta Iesu wese vonedi vonaya, “Yavona aqiaqi 'imia, tomotau vaimi ge ona 'aliga ana laba Yaubada ena 'Ebeluvine me ena waiwai nave'ifoqeyea ona 'itea.”

Iesu ana 'ita vedumaduma
(*Madiu 17:1-13; Luke 9:28-36*)

² ^w 'Inega 'aubena sikisi 'abibodanaya Iesu ana to'abibodayavo toidi Fita be Iemesa ma taina Ioni 'ebe'ewedi e maega i'watovu bwanaga taha kuena 'inaya, ta adi 'aidega itoatoa. 'Inega Iesu matadia ana 'ita vedumaduma. ³ Ta ana kaleko luwadawadaea otaqia. Ge taha toga bwa'obwa'oya ana fata kaleko na'utui be naluwadaeyei 'idewana.

⁴ 'Inega Ilaitia be Mosese i'ifoqe ta Iesu maega iveveqae. ⁵ 'Inega Fita Iesu voneaya, “Tove'ita, eda toa ba'idia aqiaqi otaqina, ana 'ita didi toi

^t 8:34 Md 10:38-39; Lk 14:27 ^u 8:38 Md 10:33 ^v 9:1 Mk 13:30 ^w 9:2-7 2Fit 1:17-18; Via 3:22

kana viaqia. Taha o'a weaqiu, ta taha Mosese weaqina ta wese taha Ilaitia weaqina." ⁶ (Fita ba'e 'idewani vona 'aiqa, mana ma enavo imwaniniva, 'inega ge dahalamanian tola'ai navonayei.)

⁷ 'Inega gawata 'ifoqe 'afwalidi ta taha vona gawatega 'ifoqe vonaya, "Ba'e Natugu, tauna yaveyolubea. Tauna ena vonayavo ona noqolia!"

⁸ 'Inega lukwayavonega i'ita givigivila ta ge taha toga ida 'itei, ta 'esi leisu ana 'aidega maega itoatoa.

⁹ leisu ma ana to'abibodayavo bwanagega iwebuwebui mai 'inega luvine neidi vonedia, "Ge taha toga ona vonevonei tola'ai ni'a o'itea bwanagaya weaqina, ana laba ya'a Tomotau Natuna 'aligega ena ya'itoto 'evivi."

¹⁰ 'Inega vona~nana ia'ukwaivea, ta taudimo iveqae leisu ena ya'itoto 'evivi 'aligega ana alamani weaqina.

^{11x} 'Inega leisu ivetala'aiea ivonaya, "Tola'ai weaqina luvine ana tove'itayavo ivonavona vonigo Ilaitia namadumai ta 'abiboda To'etoyavua namai?"

^{12y} 'Inega leisu vona 'eviviedi vonaya, "E 'idewana, Ilaitia nanugweta namai ta yani qabuna nagivetunuqidi. Ta tola'ai weaqina Buki Nugwenugweina 'inaya i'wayavia vonigo Tomotau Natuna visiq qiduana nalobei ta tomotau ina veilivu veifea? ^{13z} Ta yavonevonemi, Ilaitia ni'a mai ta tomotau edi nuenuega iveilivu kavokavovo 'inaya, 'idewana Buki Nugwenugweina madusimanea tauna weaqina."

Gwama taha niboana luveifana 'wahalia leisu giveaqiaqiea (Madiu 17:14-21; Luke 9:37-43a)

¹⁴ leisu ana to'abiboda toidi maega bwanagega ni'a iwebui mai dumi'aya, 'inega qabu qiduana 'itedi ana to'abibodayavo itoa vivilidi, ta luvine ana tove'itayavo maega iveve'ae'aetoga. ¹⁵ Ta tuta~nana qabu diavona leisu i'itea 'inega me edi qaiawa ivihila 'inaya sabi 'ebe'ewana.

¹⁶ 'Inega leisu ana to'abibodayavo vetala'aiedi vonedia, "Toyani weaqina luvine ana tove'itayavo maega oveve'ae'aetoga?"

¹⁷ 'Inega 'oloto taha qabu diavona 'idiega ve'ia voneaya, "Tove'ita, edi ve'ae'aetoga 'iuna natugu me'olotona weaqina, mana niboana luveifana ni'a 'wahalia 'inega ge ana fata navona. ¹⁸ Ta tuta qabuna tafetafefwai ta niboana~nana vevekaoya. Ta 'awanega fulofulo 'ifo'ifoqe be alana kikokiko ta wese 'wafina 'elutolele. Au to'abibodayavo yanoqiedi be vonigo niboana veifana ida 'wavi 'ifoqeyea, ta ge adi fata."

¹⁹ 'Inega leisu vonedia, "Tuta kuena omi'a maega katoatoa ta nawale nuami ge da'eqa'uuya, ta tola'ai weaqina ge oda vetumaqanegu? Debami 'i'wanina, 'inegana 'wafigu siniquaiqi. Ta gwamana omiei eda 'itei!"

²⁰ 'Inega gwama~nana imiea leisu 'inaya. Ta tuta~nana niboana luveifana leisu 'itea, 'inega gwama~nana vunuqia ta be'u bwa'obwa'oya 'eno'eno buibui ta 'awanega fulofulo 'ifo'ifoqe.

^x 9:11 Mal 3:1 ^y 9:12 Mal 4:5-6; Same 22:1-18; Ais 53:3 ^z 9:13 Md 11:14

21 'Inega Iesu gwama~nana tamana vetala'aiea vonaya, "Totutaya yani ba'e ve'ale?"

'Inega tamana vonaya, "Ena tuta goyonega. 22 Ta niboana luveifana tuta qabuna 'aiwe 'ala'alainaya ta wese go'ila felafela webuiei vonigo daluluve'aligia. Nage au fata taha yani una viaqia ta una nuakolokoloyema be una iulema?"

23 ^a 'Inega Iesu 'oloto~nana voneaya, "Tola'ai weaqina uvevetala'aiegu 'eguma ya'a agu fata? Ta yavona aqiaqieu, 'eguma taha toga me ena vetumaqana e yani qabuna ana fata naviaqia."

24 'Inega 'oloto~nana lukwayavonega vonaya, "Tawa yavetumaqana, ta nuanuagu vetumaqana~nana una giveqiduea."

25 Tutana Iesu qabu qiduana 'itedi lukwayavonega imai sabi 'itana tola'ai naviaqia, e 'inega Iesu niboana veifana lugwaeyea vonaya, "O'a niboana teniqau kwavana ta nakunakuhu, yaluvineu u'ifoqe mai ba'e gwama~nana 'inega, ta ge wese una lugu 'evivi 'inaya!"

26 ^b 'Inega niboana luveifana kolua ta gwama~nana vunuqia be'u bwa'obwa'oya dededela, ta gamonega 'ifoqe. Ta gwama~nana ana 'ita kavona to'aliga 'idewana. 'Inega tomotau qabudi ivonaya, "Yawaina ni'a gumwala." 27 Ta Iesu gwama~nana nimanaya kafi siveya'itotoya.

28 'Inega Iesu lugu vanuea, ta ana to'abibodayavo adi 'aidega maega itoatoa. 'Inega ivoneaya, "Tola'ai weaqina ima'a ge ama fata niboana~nana ada 'wavini da'ifoqe?"

29 'Inega Iesu vona 'eviviedi vonaya, "Ba'e niboana diavona ana fata venoqi namo 'inega kana 'wavinidi ina 'ifoqe."

Iesu tuta vemagilafuna simana ena 'aliga weaqina

(Madiu 17:22-23; Luke 9:43b-45)

30^c 'Inega Iesu ana to'abibodayavo maega 'abaga~nana inogea ta itauya di'we Galili 'abaganavo 'idia. Ta Iesu ge nuanuana tomotau ina alamania to'edia itoatoa, 31^d mana ana to'abibodayavo veve'itedi. 'Inega Iesu vonedi vonaya, "Nawale ya'a Tomotau Natuna agu tosuluva nave'ineiegu tomotau 'idia ina luve'aligigu, ta 'aubena toi 'abibodanaya 'aligega ena ya'itoto 'evivi." 32^e Ta ena vona ba'e weaqina nuadi ge dasimatala. 'Inega nuanuadi ina vetala'aiea vona~nana ana alamani weaqina. Ta ge ida vetala'aiei, mana Iesu ena ve'ia 'idia weaqina imwaniniva.

Togama qiduana

(Madiu 18:1-5; Luke 9:46-48)

33 Iesu ma ana to'abibodayavo i'ifoqe 'abaga Kafaneumi 'inaya, 'inega ilugu vanue gamonaya, ta Iesu vetala'aiedi vonaya, "Toyani weaqina ove'ae'aetoga 'eday?"

^a 9:23 Md 21:21; Mk 11:23 ^b 9:26 Mk 1:26 ^c 9:30 Ion 7:1 ^d 9:31 Mk 8:31; 10:32-34
^e 9:32 Lk 9:45

³⁴ Ta ena vetala'ai 'idia ge ida ve'iei, mana edi ve'ae'aetoga 'iuna vonigo togama 'idiega qidua otaqina. ^{35f} 'Inega leisu toabui ta Tuwelo~dina gaba va'auqidi imai 'inaya. 'Inega vonedi vonaya, "Eguma taha toga o'a nuanuau una veqidua e luaqiaqieu tau'u una a'uwebuieu ta tomotau weaqidi una vetofewa."

³⁶ 'Inega leisu taha gwama 'ebe'ewei miea 'avalea ta vonedi vonaya, ^{37g} "Eguma taha toga gwama ba'e 'idewana agu wawega una 'ebe'ewea, e 'inega 'idewana ya'a wese u'ebe'ewegu. Ta 'eguma ni'a u'ebe'ewegu 'inega wese agu Tovetune ni'a u'ebe'ewea."

Tomeqabu ge ina vevoalaneda e taudi ada toiula

(Luke 9:49-50)

³⁸ 'Inega Ioni leisu voneaya, "Tove'ita, 'oloto taha a'itea au wawega niboana luveifadi 'wavi 'ifoqeyedi tomotau taha 'inega. Ta ahawatayeia mana tauna ita'a ge 'idega."

³⁹ Ta leisu voneaya, "Ge ona awataye! 'Eguma taha toga viaqa 'ebenuavoqana agu wawega naviaqia, 'inega 'abiboda ge wese ana fata na'awaluveifegu. ^{40h} Mana 'eguma taha toga ge davevoalaneda e tauna ada toiula. ⁴¹ⁱ Ta yavona aqiaqiemi, 'eguma taha toga agu wawega go'ila naneimi mana omi'a ya'a Keliso egu tomotauyavo, 'inega tauna nawale ana ve'ia aqiaqina nalobea.

Ilivu luveifana eda vetumaqana nagiveluveifea

(Madiu 18:6-9; Luke 17:1-2)

⁴² "Ta yavona aqiaqiemi, 'eguma taha gwama vevetumaqanegu kavona ba'e gwama~nana, ta taha tomotau gwama~nana nasitonovia ta nagivebe'uyea luveifana 'inaya, e 'inega tositonova~nana luaqiaqiea be dabo qiduana 'ebefiaqa maganaya ina yoqonia ta malavetaya ina felaweibuiea 'abo nadamana nawebui. ^{43j} 'Inega 'eguma nimau nagivebe'uyeu luaqiaqieu be una da'a yavulea. Mana ge taha ana luveifana 'eguma nimau da'ada'ana ta yawai vataya una lobeia. Ta 'esi ge daluaqiaqieu 'eguma nimau magilafuna ta wese ma du'u wabolau ta Yaubada nafelaweibuiea 'aiwe 'ala'alata vatayana 'inaya. ⁴⁴⁻⁴⁵ Wese 'idewana 'eguma 'aeu nagivebe'uyeu, luaqiaqieu be una da'a yavulea. Mana ge taha ana luveifana 'eguma 'aeu da'ada'ana ta yawai vataya una lobeia. Ta 'esi ge daluaqiaqieu 'eguma 'aeu magilafuna ta ma du'u wabolau ta Yaubada nafelaweibuiea 'aiwe 'ala'alata vatayana 'inaya. ^{46-47k} Ta wese 'eguma matau nagivebe'uyeu una bwaqi yavulea, ge wese ana luveifana. Mana ge taha ana luveifana 'eguma matau 'aidegana ta Yaubada ena 'Ebeluvine una lobeia. Ta 'esi ge daluaqiaqieu 'eguma matau magilafuna ta Yaubada nafelaweibuiea 'aiwe 'ala'alata vatayana 'inaya.

^f 9:35 Lk 22:24-26; Md 20:25-27; Mk 10:43-44 ^g 9:37 Md 10:40 ^h 9:40 Md 12:30; Lk 11:23 ⁱ 9:41 Md 10:42 ^j 9:43 Md 5:30 ^k 9:46-47 Md 5:29

48 ^l ‘Ta ‘abaga~nana ‘inaya

mwatamwata itoatoa

ta wese ‘aiwe saesaela vatayana ge ena ‘weumo.’

49 Ta egu tovetumaqana qabudi ina vevunavunaqa ‘aiwe ‘ala‘alaina ‘inega, ‘idewana mwade’wa ana fata ‘abwaga ena tuta nagivekuea ta ge namadu’wala.

50 ^m Mwade’wa yani aqiaqina ‘abwaga weaqina, mana ana fata ‘abwaga~nana ana ‘ai nagivedibidibia ta wese ana fata be ‘abwaga ena tuta nagivekuea ‘inega ge wese na’wala. Ta ‘eguma mwade’wa ena waiwai nahawala be wese nagibwa, e ‘inega ma’oda kana viaqa ‘aiqa be navewaiwai ‘evivi be wese navedibidibi? Ta Yaubada nuanuana omi’a yawaimi kavona mwade’wa ‘idewani, ‘inega emi toa ma emiavo navenua’ewa’ewa, ta wese ge naluveifa.

“Ta emiavo maega ona toadaumwala.”

Iesu ena ve’ita sa’ila weaqina

(Madiu 19:1-12; Luke 16:18)

10 ¹ Inega Iesu Kafaneumi nogei tauya di’we Iudia ‘inaya ta ‘ifoqe go’ila Iolidani di’wenaya. ‘Inega wese qabu qiduadi iva’auta imai ‘inaya. ‘Inega ve’ale ve’itedi ‘idewana tuta qabuna veve’ita tomotau ‘idia.

² Ta Falisiavo vaina imai Iesu ‘inaya sabi sitonovina. ‘Inega ivetala’aiea ivonaya, “Eguma taha ‘oloto moqanena navesa’ilidi nage luvine nabwegei nage gebu?”

³ ‘Inega Iesu vona ‘eviviedi vonaya, “Ma’oda Mosese ena luvine ‘inaya vona ‘aiqa sa’ila weaqina?”

⁴ ⁿ ‘Inega Falisiavo ivonaya, “Mosese awafela ‘eguma ‘oloto taha nuanuana moqanena navesa’ilidi, ‘inega luaqiaqiea be nugweta leta na’wayavia ena noga weaqina, ta ‘abiboda ana fata nanogedi.”

⁵ Ta Iesu vonedia, “‘Idewani. Ta yavona aqiaqiemi, Mosese ba’e luvine~nana ‘wayavia omi’a emi vedeba ‘i’wana weaqina.

⁶ ^o “Ta ona nuaia tuta ‘ebeve’ale ‘inaya Yaubada tomotau magilafudi viaqidi me’olotona be wese mevavinena. ⁷ ^p ‘Inegana ‘oloto tamana be inana nanogedi ta moqanena maega ina ve’aidega. ⁸ Ta magilafudi ‘wafidi nave’aidega, mana lova magilafudi itoa dumaduma, ta ‘itagana ni’a ive’aidega. ⁹ ‘Inegana tola’ai Yaubada ni’a luvetubedi ge taha toga navetoasi’iedi!”

¹⁰ ‘Abiboda Iesu ana to’abibodayavo maega i’evivi imai vanuea. Ta ‘inega wese Iesu ivetala’aiea sa’ila weaqina. ¹¹ ^q ‘Inega Iesu vonedi vonaya, “Eguma taha ‘oloto moqanena navesa’ilidi ta navaqi ukamana mali vavine ‘idia, e ‘inega ‘oloto~nana ena ilivu ‘inega luabu ilivuna ni’a viaqia moqanena nugwenugweidi ‘idia, mana edi vaqi bwegea. ¹² Ta wese

^l 9:48 Ais 66:24 ^m 9:50 Md 5:13; Lk 14:34 ⁿ 10:4 Luve 24:1-4; Md 5:31

^o 10:6 Nug 1:27; 5:2 ^p 10:7-8 Nug 2:24; Efe 5:31-33 ^q 10:11 Md 5:32

'idewana 'eguma vavine taha moqanedi ina sa'ilea ta ina vaqi ukamana taha 'oloto 'inaya, e 'inega taudi wese luabu ilivuna tawa iviaqia."

Ieisu gogama vona veyolubedi
(Madiu 19:13-15; Luke 18:15-17)

¹³Tomotau gogama goyogoyodi imiedi Ieisu 'inaya nuanuadi nagitonovidi. Ta ana to'abibodayavo tomotau diavona iawatayedi. ¹⁴Tutana Ieisu awataya~nana noqolia, 'inega nuana luveifa ta lugwaeyedi vonaya, "Gogama ge ona awatayedi ta 'esi ona awafeledi ina mai 'iguya, mana Yaubada ena 'Ebeluvine taudi weaqidi. ¹⁵^r Yavona aqiaqiemi, 'eguma taha toga Yaubada ena 'Ebeluvine ge na'awahaqiaqiei kavona gogama 'ebeluvine~nana i'awahaqiaqiea, e 'inega tomotau~nana ge wese ana fata be nalugu 'inaya." ¹⁶'Inega Ieisu gogama 'esilagaidi ta nimanega gitonovidi be vona veyolubedi.

'Oloto taha kaikaiwabuna weaqina
(Madiu 19:16-30; Luke 18:18-30)

¹⁷'Inega Ieisu tutuvila tauya, ta tauya~nana 'inaya taha 'oloto vihila mai 'inaya tuqatuqanega sobadi ta voneaya, "Tove'ita aqiaqiu, tola'ai ena viaqi be 'inega yawaigu vataya ena lobei?"

¹⁸Ta Ieisu voneaya, "Ma'oda 'inega u'awahaqiaqiegu, mana ge taha toga aqiaqina ta 'esi Yaubada ana 'aidegamo. ¹⁹^s Ta o'a Yaubada ena luvineavo ni'a ualamanidi,

Ge una luve'aliga.

Ge una luabu.

Ge una vanawala.

Ge u'avega tomotau una 'awaluveifedi.

Ge u'avega tomotau edi kulufa una 'ewedi.

Ta wese tamau be inau una 'amayabedi."

²⁰'Inega 'olotona vonaya, "Tove'ita, egu tuta gwama'unu 'inega ba'e luvine diavona qabudi ya'abiboda aqiaqiedi."

²¹'Inega Ieisu 'oloto~nana 'ita makimakia ta voneaya, "Iagu yaveyolubeu, ta yani 'aideganamo 'inega uva'waqi. 'Inega una 'evivi eu 'abagaya ta eu kulufa qabudi una vegimwaneyedi be adi ve'ia una 'ewei una vewila'ayedi lukwalukwa 'idia, ta 'inega una mai una 'abibodegu. 'Inega eu kaikaiwabu mahalaya una lobe." ²²Ieisu ena vona ba'e 'oloto~nana noqolia, 'inega me ena nuavita 'evivi tauya, mana ena kaikaiwabu vegagalea.

²³'Inega Ieisu 'itagivila ta ana to'abibodayavo vonedi vonaya, "Tomeqabu me edi kaikaiwabu edi lugu Yaubada ena 'Ebeluvine 'inaya vitana."

^r 10:15 Md 18:3 ^s 10:19 'Ifo 20:12-17; Luve 5:16-20

²⁴ Ta Ieisu ena vona ba'e weaqina ana to'abibodayavo nuadi voqana. 'Inega Ieisu wese vonaya, "Natugwavo, Yaubada ena 'Ebeluvine ana lugu vitana. ²⁵ 'Inega 'ebevetalatutula ba'e ona noqolia: Yubai kameli ena lugu saima vetoana 'inega vitana, ta taudi kaikaiwabudi edi lugu Yaubada ena 'Ebeluvine 'inaya vita otaqina."

²⁶ 'Inega wese to'abiboda~dina nuadi voqana qiduana Ieisu ena vona weaqina ta ivonaya, "Inega togama ana fata 'etoyavua vataya nalobei?"

²⁷ Ta Ieisu 'itedi vonedia, "Tomotau taudiega ge adi fata. Ta Yaubada 'inaya yani qabuna ana fata."

²⁸ 'Inega Fita voneaya, "Kaiwabu, ima'a ma'oda, mana ema kulufayavo qabudi ni'a anogedi ta a'abi'abibodeu?"

²⁹ Ta Ieisu vonedia, "Yavona aqiaqiem, 'eguma tomeqabu edi vanueavo nage taidiavo be, novudiavo be, inadiavo be, tamadiavo be, natudiavo, ta wese edi vaoqayavo ni'a inogedi Valegu aqiaqina ana simana weaqina, ³⁰ e 'inega adi ve'ia ma ana luvetomana 'idewani edi vanueavo be, taidiavo be, novudiavo be, inadiavo be, natudiavo be wese edi vaoqayavo 100 'idewani ina lobe. Ta ba'e yani diavona ina lobedi vaina vita maega, 'inega tuta maimai 'inaya yawai vataya ina 'ewea. ³¹ ' Ta tomeqabu ba'itaga inugwenugweta nawale ina 'abiboda, ta tomeqabu ba'itaga i'abi'abiboda nawale ina nugweta."

Ieisu ena simana vetoina ena 'aliga weaqina
(Madiu 20:17-19; Luke 18:31-34)

³² " Nawale 'edaya itautauya sabi 'watovu Ielusalema 'inaya, ta Ieisu ana to'abibodayavo 'abibodanega itautauya me edi nuavoqana, mana lova Ieisu ena vona 'idia weaqina inuanua. Ta wese vaina tomotau me edi mwaniniva 'edaya i'abi'abibodedi. 'Inega Ieisu Tuwelo~dina gaba va'auqidi imai ta 'ewedi ivanaqo 'eda tufinaya sabi vematamagilafuyedi tola'ai nawale na'ifoqe 'inaya. ³³ 'Inega vonedi vonaya, "Ka'wato'watovu Ielusalema 'inaya, ta omo'e 'inaya ya'a Tomotau Natuna agu tosuluva nasuluvegu toveguba qiduquduadi be luvine ana tove'itayavo 'idia. Ta taudimo ina dima govaqa egu 'aliga weaqina, be 'abiboda ina ve'ineiegu taudi ge me Diu 'idia. ³⁴ Ta ina givenu'wegu be ina gida'wegu ta wese wayo metametanega ina vunuqa dadanegu, 'inega ina luve'aligigu. Ta 'aubena toi 'abibodanaya ena ya'itoto 'evivi."

Iemesa be Ioni edi vetala'ai
(Madiu 20:20-28)

³⁵ 'Inega Iemesa be Ioni, taudi Sebedi natunavo, imai Ieisu 'inaya ivoneaya, "Tove'ita, anoqinoqieu taha yani una viaqia weaqima."

^t 10:31 Md 20:16; Lk 13:30 ^u 10:32-34 Mk 8:31; 9:31

³⁶ Ta Ieisu vonedi vonaya, “Tola'ai nuanuami ena viaqi 'imia?”

³⁷ Ta ivoneaya, “O'a tuta nana una toatoa eu 'Ebeluvine aqiaqi otaqina gamonaya 'inega nuanuama ima'a una awafelema be di'weuya ana toabui, taha au 'ataqia ta taha au kelia.”

³⁸ v 'Inega Ieisu vona 'eviviedi vonaya, “Omi'a emi noqi ba'e ana alamani ge oda alamania. Nawale visiqa vedina 'inega ena numa, nage omi'a wese ami fata vedi~nana 'inega ona numa? Ta wese visiqa ana babitaiso 'inega ena babitaiso, nage omi'a wese ami fata 'idewani ona babitaiso 'aiqa?”

³⁹ w Ta ivonaya, “Ama fata!”

'Inega Ieisu vonedi vonaya, “Vonahaqiaqi, vedi~nana 'inega ena numa omi'a wese 'inega ona numa. Ta wese babitaiso~nana 'inega ena babitaiso omi'a wese ona babitaiso. ⁴⁰ Ta ge agu fata ba'itaga ena venua'ivina tomeqabu nawale agu 'ataqia be wese agu kelia ina toabui, gebu'e! Mana lova Yaubada ena tomotauyavo ni'a venua'ivinedi 'inega edi 'ebetoa ni'a 'iva'ava'aia.”

⁴¹ 'Inega to'abibodayavo teni Iemesa be Ioni edi noqi inoqolia ta diadi vilea 'idia. ⁴² x 'Inega Ieisu to'abiboda~dina gaba va'auqidi imai vonedi vonaya, “Ni'a oalamanian bwa'obwa'o ana toluvineavo taudiega adi wawa igivaneyea, ta luvine falafalana edi tomotauyavo ineineidi. ⁴³ v Ta omi'a ge wese 'idewana ona viaqa 'aiqa. Ta 'esi 'eguma taha toga 'imiega nuanuau una veqidua eu qabu gamonaya, e luaqiaqieu be nugweta emwavo qabudi una vetofewa weaqidi. ⁴⁴ Ta wese 'eguma togama 'imiega nuanuau una vetovanugweta e luaqiaqieu tomotau qabudi weaqidi una vetofewa. ⁴⁵ Mana ya'a Tomotau Natuna wese 'idewana yamai bwa'obwa'oya gebu tomotau weaigu ina vetofewa, ta 'esi ya'a tomotau ena vetofewa 'idia. Ta wese yawaigu yagubaufayea emi luveifana weaqina sabi 'etoyavuimi.”

Ieisu Batimio matana giveaqiaqiea

(Madiu 20:29-34; Luke 18:35-43)

⁴⁶ 'Inega Ieisu ma ana to'abibodayavo imai 'abaga Ieliko 'inaya ilugu. Ta 'abiboda 'abaga~nana inogea ta qabu qidwana maega itauya. 'Inega taha 'oloto tomatkwaya ana wawa Batimio, tauna Timio natuna, 'eda nanavinaya toatoa. Ta tauna tuta qabuna venoqi mane be wese kulufa weaqidi. ⁴⁷ Ta tuta~nana noqolia Ieisu Nasaleta 'olotona 'ifoqe maimai 'inega gaba vonaya, “Ieisu ye, o'a Deibida natuna, uda nuakolokoloyegu!”

⁴⁸ Tomotau qabudi Batimio iawatayea ivoneaya, “Aia, ulua'u!”

Ta tua wese bonana qiduanega gaba vonaya, “Deibida natuna ye, uda nuakolokoloyegu!”

v 10:38 Mk 14:36; Lk 12:50 w 10:39 Via 12:2; Ve 1:9 x 10:42 Lk 22:25-26

v 10:43 Md 23:11; Mk 9:35

49 'Inega leisu veutovolo ta vonaya, "Ogabei mai!"

'Inega tomotau matakwaya~nana igabea ivoneaya, "Me eu qaiawa una ya'itoto mana leisu gabegabeu." 50 'Inega ana kwakwalufai vata'ia yavulei, ta lukwayavonega ya'itoto mai leisu 'inaya.

51 'Inega leisu vetala'aiea vonaya, "Nage tola'ai nuanuau ena viaqi 'iuya?"

'Inega matakwaya~nana vonaya, "Tove'ita, nuanuagu matagu una giveaiaqiedi be yaqisa agu fata ena 'ita."

52^z 'Inega leisu vonea vonaya, "Una tauya, mana eu vetumaqana 'inega matau ni'a veaiaqi." Ta omo'e tutana 'inaya 'oloto matana 'eaea ta 'ita aiaqi, 'inega 'edaya leisu 'abibodea.

Iesu ena lugu Ielusalema 'inaya

(Madiu 21:1-11; Luke 19:28-40; Ioni 12:12-19)

11 1 Iesu ma ana to'abibodayavo tuta goyona ina lugu 'abaga qiduana Ielusalema 'inaya. Ta tutana i'ifoqe 'abaga goyogoyona Bedifegi ta wese Bedani 'idia bwanaga Olibe 'inaya, 'inega leisu ana to'abiboda magilafudi luvetunedi, 2 ta vonedi vonaya, "Ona tauya taha 'abaga 'iawamia ta tutana ona 'ifoqe ona 'itea yubai doniki kekeyavauna yoqoyoqonina toatoa, ge taha toga lova dagelu tonovi. 'Inega ona li'ami ona miea ba'idia. 3 'Eguma taha toga navetala'aiemi navonaya, 'Tola'ai weaqina doniki oli'ali'ami?' 'Inega omi'a ona voneaya, 'Kaiwabu nuanuana ta nawale nave'evivia namai.' "

4 'Inega magilafudi itauya ta doniki~nana yoqoyoqonina ilobe a tovtovolo 'eda nanavinaya taha vanue masu'edaninaya. Doniki~nana ni'a ive'ale ili'ali'ami, 5 ta 'inega vaina tomotau di'wedja itovotovolo ivetala'aiedi ivonaya, "Tola'ai weaqina doniki oli'ali'ami?"

6 'Inega magilafudi totoa 'abaga ivonedi tola'ai leisu ni'a vonedi 'idewani. 'Inega doniki~nana iawafelea ta magilafudina i'ebe'ewei itauyea leisu 'inaya. 7 Ta adi kwakwalufai ivata'ia ta doniki~nana gwavunaya ita'ulia, ta leisu gelu. 8 'Inega tomotau qabudi wese adi kwakwalufaiega 'eda ita'ulia. Ta wese vaina tomotau 'aiwe laqana vaoqega ida'edi ta 'inega 'eda ita'ulia. 9^a Vaina tomotau leisu inugwetea ta wese vaina i'abibodea, ta qabudi ikolukolua ivonaya,

"Osana, osana! Kaiwa qiduana!

Yaubada, nuanuama tauna maimai Kaiwabu ana wawega una vona veyolubea.

10 Aqaiawa qiduana mana nawale tubuma Deibida ena 'Ebeluvine na'ifoqe.

'Inega Yaubada Toatoa Vanena

^z 10:52 Mk 5:34 ^a 11:9-10 Same 118:25-26; 148:1

'evosiega ahawahawatuboya.”

¹¹ Ieisu ni'a i'ifoqe Ielusalema ta lugu Vanue Gwalagwalana 'inaya, ta yani qabuna 'elo'itedi. Ta ni'a velavilaviea 'inega Tuwelo~dina maega i'evivi Bedani 'inaya sabi veyawai.

Ieisu 'ala'ai vona ve'alatea

(Madiu 21:18-19)

¹² Ta ni'a mahala ahalia 'inega Bedani inogea ta wese i'evivi itautauya Ielusalema weaqina, ta 'edaya Ieisu botana. ^{13b} 'Inega tufwana luluvaiega 'ala'ai 'waena 'itea, 'inega vanaqo di'wenaya ta nuanuana vuaqina nalobea. Ta ge taha vuaqina da'itei ta 'wae 'ava'avana, mana ge 'ala'ai ena tuta vuaqa. ¹⁴ 'Inega Ieisu 'aiwena vona ve'alatea vonaya, “Tuta maimai 'inaya ge taha tuta una vuaqa 'evivi be tomotau ina 'ai.” Ta Ieisu ana to'abibodayavo vona~nana inoqolia.

Ieisu tovegimwane 'wavinidi Vanue Gwalagwalana 'inega

(Madiu 21:12-17; Luke 19:45-48; Ioni 2:13-22)

¹⁵ Ieisu ma ana to'abibodayavo ni'a i'ifoqe Ielusalema 'inaya. 'Inega lugu Vanue Gwalagwalana 'inaya ta tovegimwane be wese togimwane 'wavinidi i'ifoqe. Ta mane ana tosenisiavo edi 'ebea'u 'e'auuinidi ta wese bunebune adi tovegimwaneavo edi 'ebetoa 'e'auuinidi. ¹⁶ 'Inega tomotau 'etobodedi ge wese taha toga me ena kulufa nalugu Vanue Gwalagwalana 'inaya sabi vegimwane. ^{17c} 'Inega ve'itedi vonaya,

“Buki Nugwenugweina gamonaya

Yaubada ena vona 'waya'wayavina vonaya,

'Egu vanue ina gabea vanue 'ebevenoqi

tomotau qabudi weaqidi.

Ta omi'a ogivilea tovanawala adi watu'ubu.”

^{18d} Ta toveguba qiduquduadi be wese luvine ana tove'itayavo Ieisu ena vona ba'e inoqolia, 'inega imwaninivea, mana tomotau nuadi 'ewea ena ve'ita weaqina. Ta adi 'aidega idima govaqa ma'oda 'inega Ieisu ina luve'aliga 'aiqi. ¹⁹ Ta ni'au baba'au lia'unuva 'inega Ieisu ana to'abibodayavo maega Ielusalema inogea.

Vetumaqana ena waiwai

(Madiu 21:20-22)

²⁰ Ta mahala ahalia Ieisu ma ana to'abibodayavo i'evivi itautauya Ielusalema weaqina. 'Inega 'edaya 'aiwe 'ala'ai 'itea galunega be webui kwalamina 'inaya qabuna ni'a kwavuqa. ²¹ 'Inega Fita Ieisu ena vona nuave'avinia ta voneaya, “Tove'ita, u'itei! 'Aiwe~nana goluanaya uvona ve'alatea ni'a kwavuqa!”

^b 11:13 Lk 13:6 ^c 11:17 Ais 56:7; Iel 7:11 ^d 11:18 Mk 14:1

²² 'Inega Ieisu voneaya, "Yaubada ona vetumaqanea! ²³ ^e Yavona aqiaqiemi, 'eguma me emi vetumaqana 'inega bwanaga omo'e ona voneaya, 'Utovalo utoaiqo mwade'waya!" ta ge ona venuana magilafu, e 'inega emi vona namatayagea. ²⁴ ^f 'Inega yavona aqiaqiemi, 'eguma me emi vetumaqana taha yani weaqina ona venoqi, e 'inega Yaubada ana fata yani~nana naneimi. ²⁵ ^g Ta tutana ona venoqi Yaubada 'inaya e nugweta tomotau ona nuataqodi edi luveifana 'imia weaqina, be yaqisa Tamami mahalaya omi'a wese emi luveifana nanuataqodi." ²⁶ (-)^h

Ieisu ivetala'aiea ena luvine 'iuna

(Madiu 21:23-27; Luke 20:1-8)

²⁷ Ieisu ma ana to'abibodayavo wese i'evivi imai Ielusalema. Ta Ieisu Vanue Gwalagwalana 'atamaninaya luluyaba dadana, 'inega toveguba qiduquduadi be luvine ana tove'itayavo ta wese 'abaga ana tovanugwetayavo imai 'inaya. ²⁸ 'Inega Ieisu ivetala'aiea ivonaya, "Ei, o'a toga ena luvineyega tovegimwaneavo u'wavi 'ifoqeyedi? Ta wese togama eu luvine neiu 'inega ba'e 'idewana uviaviaqa 'aiqa?"

²⁹ 'Inega Ieisu vonedi vonaya, "Nugweta ena vetala'aiemi be 'eguma ona ve'iea, e 'inega wese ya'a ena vonemi egu luvine weaqina. ³⁰ Egu vetala'ai ba'e, togama ena luvineyega Ioni tomotau givebabitaisodi, nage mahalega nage tomotau 'idiega?"

³¹ 'Inega taudiega iveveqae ivonaya, "Eguma kana vonaya, 'Mahalega', 'inega nawale navona 'evivieda navonaya, 'Tola'ai weaqina Ioni ge oda vetumaqanei?" ³² Ta 'eguma kana vonaya, 'Tomotau 'idiega', e nawale tomotau qabudi ina nualuveifa 'idaya, mana qabudi Ioni i'awahaqiaqiea tauna tovesimasimana aqiaqi." ³³ 'Inega Ieisu ivona 'eviviea ivonaya, "Ima'a ge ada alamania."

'Inega Ieisu vonedia, "Eguma omi'a egu vetala'ai ge oda ve'iei, e 'inega ya'a wese ge ena vonemi togama ena luvine 'inega ba'e 'idewani yaviaviaqa 'aiqa."

Vona sesebai vaoqa ana to'itamaki weaqidi

(Madiu 21:33-46; Luke 20:9-19)

12 ¹ ⁱ 'Inega Ieisu vona sesebaiega vonedi vonaya, "Taha 'oloto 'oine ana loi 'wadia ena vaoqa gamonaya, 'inega wese 'alia ta 'oine ana 'ebememe 'iva'ava'aia. Ta wese gweda taha kuena 'ebevekova vaoqa gamonaya yoqonia. 'Inega tomotau 'ewedi ta ena vaoqa i'itamakia, ta tauna tauya mali di'we 'inaya.

^e 11:23 Md 17:20 ^f 11:24 Md 7:7 ^g 11:25 Md 6:14-15 ^h 11:26 Maki ena buki taunega 'wayavia, ta 'abiboda vaidi to'wayavi buki~nana i'wayavi 'eviviea, 'inega vaidi laba 26 wese ia'uya, ta ana noqola ba'e 'idewani: "Ta 'eguma tomotau ge ona nuataqodi, 'inega Tamami mahalaya ge wese nanuataqomi emi luveifana weaqina." ⁱ 12:1 Ais 5:1-2

2“Ta bolimana ana tutaya tonivaoqa~nana ena tofewa vetunea ena vaoqaya vaina 'oine vuaqina sabi 'ewadi to'itamaki 'idiega. 3Ta vaoqa ana to'itamakiavo tofewa~nana i'itea 'inega ikafia ta ivunuqia. 'Inega iluvetune 'eviviei tauya nima 'ava'avana. 4'Inega tonivaoqa ena tofewa wese taha luvetunei tauya, ta ana kiaya ivunuqia ta iveilivu veifea. 5'Inega wese taha tofewa luvetunea 'idia, ta tauna iluve'aligia. Ta wese ena tofewa qabudi luvetunedi ta vaina ivunuqidi be wese vaina iluve'aligidi.

6“Ta wese tonivaoqa~nana natu otaqina toatoa ta veyolubea qiduana. 'Inega ena nuenuega vonaya, 'Ba'e natu otaqigu, 'inega ina 'amayabea', 'abo vetunei tauya. 7'Inega to'itamaki diavona natuna i'itea maimai 'idia ta taudimo idima govaqa ivonaya, 'Emavo, 'oloto omo'e maimai tauna kaiwabu natuna 'unutauna. Tauna nawale bwa'obwa'o qabuna na'ewea. Ta kana luv'e'aligia e 'inega ita'a ba'e vaoqa~nana taudega kana luvinea.' 8^j 'Inega ikafia ta iluve'aligia, ta vaoqega ifelawe buiea 'ali gwavuya.”

9Iesu ena velulu'uya ba'e lu'ovoia 'inega vetala'aiedi vonaya, “Tola'ai nawale tonivaoqa~nana naviaqi to'itamaki diavona 'idia?” Ta Iesu taunega vona 'eviviedi vonaya, “To'itamaki diavona nawale naluve'aligidi be 'oine vaoqina nahawafelea mali tomotau 'idia.” 10^k 'Inega Iesu wese vonedi vonaya,

“Nage Buki Nugwenugweina ena simana
ge oda nuave'avinia vonaya,

‘Taha 'oqola lova vanue ana to'eyoqona inogea,
ta ba'itagana Kaiwabu ni'au 'oqola~nana vetovolo nugwetea
be 'oqola qabudi luviluvinedi.

11 Ba'ena eda Kaiwabu ena viaqa, ta viaqa~nana ana 'ita aqiaqi otaqina 'idaya.’ ”

12Iesu ena vona sesebai ba'e toveguba qiduiduadi be luvine ana tove'itayavo ta wese 'abaga ana tovanugwetayavo inoqolia, ta ni'a ialamania vonigo taudi weaqidi vonavona. 'Inega nuanuadi taha 'eda ina salia ta ina kafia. Ta ge ida kafia, mana imwaniniva qiduana tomotau qabudi weaqidi, 'inega Iesu inogea ta itauya.

Vetala'ai takesi weaqina
(Madiu 22:15-22; Luke 20:20-26)

13^l Ta 'abibodanaya tovanugweta diavona vaina Falisi ta wese Elodi ena tomotauyavo iluvetunedi Iesu 'inaya sabi sitonovina. Mana nuanuadi Iesu ena vona weaqina vonigo ina kafia. 14'Inega imai Iesu 'inaya ta ivonaya, “Tove'ita tawa ahalamaniu, o'a 'oloto tunutunuqiu ta eu ilivu aqiaqina. Ta wese tomotau ge uda mwaniniva edi waiwai weaqina. Ta Yaubada ena 'eda vonahaqiaqi 'inega uveve'itayea. 'Inega nuanuama ana vetala'aieu taha

^j 12:8 Ibe 13:12 ^k 12:10-11 Same 118:22-23 ^l 12:13 Lk 11:53-54

yani weaqina. Ma'oda luaqiaqiea be toluvine agona Sisa 'inaya takesi kana a'uya nage gebu? ¹⁵Nage takesi kana vemaisi nage gebu?"

Ta Ieisu edi nuanua luveifana ni'a alamania ivevemeaqila, 'inega vonedi vonaya, "Tola'ai weaqina 'aqegu olihilihia? Ta mane taha omiei eda 'itei!" ¹⁶'Inega mane~nana ineia ta Ieisu vetala'aiedi vonaya, "Ovonegu, mane ba'ena toga 'aye'ayewana ta ma'oda ana wawa?"

'Inega ivoneaya, "Toluvine qiduana Sisa."

^{17m} 'Inega Ieisu vonedi vonaya, "E 'inega toluvine Sisa ena yani Sisa ona neia, ta Yaubada ena yani wese Yaubada ona neia!" 'Inega Ieisu ena vona ba'e weaqina nuadi voqana qiduana.

Vetala'ai to'aliga edi ya'itoto 'evivi weaqina

(Madiu 22:23-33; Luke 20:27-40)

^{18 n} 'Inega vaina Sadusiavo, taudi ge ida vetumaqana to'aliga edi ya'itoto 'evivi weaqina, imai Ieisu 'inaya ivetala'aiea, ^{19 o} ivonaya, "Tove'ita, lova Mosese ena luvine a'uya vonaya, "Eguma taha 'oloto na'aliga ta natu geqana, e 'inega taina wada'ena maega ina vaqi, ta natudiavo to'waiva~nana ana luseana.' "

²⁰'Inega 'ebevetalatutula taha Ieisu ineia ivonaya, "Taha 'oloto ma tainavo adi yau seveni itoatoa. Ta 'oloto~nana vavine taha maega ivaqi, ta 'abiboda yawaina gumwala ta natu geqana. ²¹'Inega to'waiva~nana ana gwavu'ifo wada'ena maega ivaqi. Ta tauna wese yawaina gumwala ta natu geqana. Ta wese vetoina 'idewani. ²²'Inega tainavo qabudi 'idewani wada'ena ivaqia ta i'waiva 'ovoa ta qabudi wese natu geqadi. Ta 'abiboda wada'e~nana wese yawaina gumwala ta natu geqana. ²³Ta 'eguma tomotau ina ya'itoto 'evivi, 'inega ba'e vavine~nana to'oloto nawale moqane otaqina, mana ma tainavo qabudi ivaqia?"

²⁴Ta Ieisu edi vetala'ai ve'iea vonaya, "Omi'a emi nuanua luveifana, mana Buki Nugwenugweina ena simana ta wese Yaubada ena waiwai ge oda alamania. ²⁵Ta ya'itoto 'evivi ana 'aubena 'inaya tomotau ge wese ina vaqi. Vonahaqiaqi, edi toa nawale Yaubada ena tovale'ewa qabudi mahalaya itoatoa 'idewani. ^{26p} Nage ge oda avoya Yaubada ena vona 'imia ya'itoto 'evivi weaqina tuta~nana taunega 'ifoqe Mosese 'inaya 'aiwe yamwayamwana 'inega, vonaya, 'Ya'a Ebelamo ena Yaubada ta Iakobo ena Yaubada ta wese Aisake ena Yaubada.' ²⁷'Inega yavona aqiaqiemi, Yaubada ge tomotau 'ali'aligidi edi Yaubada ta 'esi tomotau mayawaidi edi Yaubada. Ta omi'a emi ve'ita yani ba'e weaqina luveifa otaqina."

^m 12:17 Lom 13:7 ⁿ 12:18 Via 23:8 ^o 12:19 Luve 25:5 ^p 12:26 'Ifo 3:2,6

Luvine qidua va'inena
(Madiu 22:34-40; Luke 10:25-28)

28^q 'Inega luvine ana tove'ita taha mai ta Ieisu be Sadusiavo edi ve'ae'aetoga noqolia. Ta wese Ieisu ena ve'ita aqiaqina Sadusiavo 'idia noqolia 'inega vetala'aiea vonaya, "Tove'ita, luvine qabuna 'idiega ai luvine qidua va'inena?"

29^r 'Inega Ieisu voneaya, "Luvine qidua va'inena ba'e, 'Omi'a me Isileli, ona noqola aqiaqi, Kaiwabu eda Yaubada ana 'aidega Yaubada otaqa. 30 Eu Kaiwabu Yaubada una veyolubei giwaliu qabuna 'inega be, niboaniu qabuna 'inega be, eu nuanua qabuna 'inega ta wese eu waiwai qabuna 'inega." 31^s Ta taha wese luvine qidua 'eno'eno vonaya, "Tomotau una veyolubedi 'idewani tau'uyega uveveyolubeu.' Ge taha wese luvine ana fata ba'e luvine~dina naveqidua va'inedi."

32 'Inega 'oloto~nana Ieisu ena vona ve'iea vonaya, "Tove'ita, eu vona ba'e vonahaqiaqi. Yaubada ana 'aidega otaqa, ta ge taha wese Yaubada datoatoa. 33^t 'Inega luaqiaqieda Yaubada kana veyolubea giwalida qabuna 'inega, ta nuada qabuna 'inega ta eda waiwai qabuna 'inega. Ta wese tomotau kana veyolubedi 'idewana taudega kaveveyolubeda. Lova veguba yubai gabugabudi 'idiega yani 'ena'ina weaqimi, ta luvine magilafudina ba'e adi matayaga guba qabudi veqidua va'inea."

34 Ta 'inega Ieisu 'oloto~nana ena vona ve'iea vonaya, "O'a toalamani aqiaqiu, ge tuta kuena 'inaya Yaubada ena 'Ebeluvinea una lugu." Ta tuta ba'e 'abibodanaya ge taha toga Ieisu davetala'aiei, mana ena alamani weaqina imwaniniva.

To'etoyavua Keliso Deibida ena gadeyega
(Madiu 22:41-46; Luke 20:41-44)

35 Tutana Ieisu Vanue Gwalagwalana 'atamaninaya veve'ita tomotau 'idia 'inega vetala'aiedi vonaya, "Ma'oda 'inega luvine ana tove'itayavo ivonavona To'etoyavua Keliso tauna Deibida natuna? 36^u Mana Deibida taunega Niboana Gwalagwalana 'inega simana vonaya,

'Yaubada egu Kaiwabu 'inaya vonaya,

"Ataqiguya una toabui ana laba voalamwavo
ena a'uwebuiedi ta una luvinedi."

37 Ta Deibida~nana ena Kaiwabu Keliso. 'Inega ma'oda ana fata Deibida ena gadeyega Keliso 'abibodanaya na'ifoqe?"

Luvine ana tove'itayavo edi ilivu weaqina
(Madiu 23:1-36; Luke 20:45-47)

Ta tomotau qabudi Ieisu ena ve'ita inoqolia ta nuadi 'ewea. 38 'Inega Ieisu tomotau qabudi vonedi vonaya, "Luvine ana tove'itayavo edi

^q 12:28 Lk 10:25-28 ^r 12:29-30 Luve 6:4-5 ^s 12:31 Luvi 19:18 ^t 12:33 1Sam 15:22; Ose 6:6 ^u 12:36 Same 110:1

ilivu ge ona 'abibodei. Mana taudi iyabayaba 'abaga 'ebeva'auta 'inaya, ta nuanuadi adi kwakwalufai ta aqiaqina tomotau ina 'itea ta ina 'amayabedi be ina lukaiwa 'idia. ³⁹Ta wese nuanuadi vanue tafwalolo 'inaya 'ebetoea aqiaqina 'idia ina toabui, ta wese sagali ana tutaya nuanuadi tomotau qiduquduadi edi 'ebetoyaya ina toabui. ⁴⁰Ta wese nuanuadi tomotau ina 'awahaqiaqiedi edi venoqi kuena tomotau matadia weaqina. Ta wese wadawada'e 'waivega iu'avedi ta edi kulufa ivanawalidi. Ta vonahaqiaqi nawale luvematasabu waiwaina Yaubada 'inega ina lobe a edi ilivu luveifana weaqina."

Wada'e taha ena nei kavovo

(Luke 21:1-4)

⁴¹Ieisu Vanue Gwalagwalana 'atamaninaya mane ana 'ebea'u di'wenaya toabui, ta tomotau qabudi vevekovedi tuta~nana edi nei kavovo ia'ua'udi 'ebea'u gamonaya. Ta tovekaikaiwabu edi mane qiduana ia'udi. ⁴²Ta Ieisu wada'e lukwalukwana taha 'itea mai ta ena nei kavovo mane goyogoyodi magilafuna a'uya.

⁴³^v 'Inega Ieisu ana to'abibodayavo gaba va'auqidi vonedi vonaya, "Vonahaqiaqi, wada'e ba'e ena nei kavovo 'inega tomotau qabudi edi nei kavovo veqidua va'inedi. ⁴⁴Mana qabudi edi mane qiduana nawale 'eno'eno, ta wada'e lukwalukwana ba'e ena mane qabuna a'uya, ta ge taha wese da'eno'eno 'inaya ana 'abwaga ana gimwane weaqina."

Tuta vitana nawale na'ifoqe

(Madiu 24:1-14; Luke 21:5-19)

13 ¹Tutana Ieisu Vanue Gwalagwalanega 'ifoqe 'inega ana to'abiboda taha vonea vonaya, "Tove'ita u'itei, vanue ba'e ana viaqa aqiaqi otaqina. Ta dabo qiduquduadi 'idiega iyoqonia!"

²^w 'Inega Ieisu vonaya, "Ba'e yani diavona ba'itaga u'ite'itedi nawale ina qeu'ovoidi, ge taha ana dabo naluve'avina be una 'ita 'eviviei."

³'Abiboda Ieisu Olibe bwanagaya toabui ta 'inega Vanue Gwalagwalana Ielusalema 'inaya 'ita naqo 'itea. 'Inega Fita be, Iemesa be, Ioni ta wese Anidulu adi 'aidega imai Ieisu 'inaya maega ivevegae, 'inega ivoneaya, ⁴"Kaiwabu, una vonema, totutaya ba'e Vanue Gwalagwalana ina qeuni? Ta wese una vonema to'ebe'ita na'ifoqe matamaya be yaqisa yani diavona ni'a uvonayedi ana alamani aqiaqiedi adi tuta ni'a mai?"

⁵'Inega Ieisu vonedi vonaya, "Ona 'itamakimi, mana nawale vaina tomotau ina u'avemi tuta 'ebeluvova weaqina! ⁶Agu wawega nawale tomotau 'eala ina mai ina vonaya, 'Ya'a ba'e taugu to'etoyavua~nana!"

^v 12:43 2Kol 8:12 ^w 13:2 Lk 19:44

Ta tomotau qabudi ina u'avedi, ta ina 'abibodedi. ⁷Ta wese vale ona noqolidi avia luluvaia be di'wedaya weaqidi. Ta ge ona mwaniniva mana ba'e yani diavona ina madunugweta ta 'abibodanaya tuta 'ebel'uova na'ifoqe. ⁸Mali qabu be mali qabu maega ina luavia, ta wese mali di'we be mali di'we maega ina luavia. Ta wese mwani'ini'i be botana di'we taha taha 'idia na'ifoqe. Ba'e yani diavona tuta vitana ana 'ebeve'ale.

^{9x} "Ta ona 'itamakimi, nawale tomotau ina kafimi ta ina tauyemi kotu weaqina. Ta wese vanue tafwalolo 'inaya ina vunuqa dadanemi. Nawale agu wawa weaqina ina vetovolomi toluvineavo be wese kiniavo matadia. Ta omo'e tuta~nana 'inaya Valegu Aqiaqina ona simanea 'idia. ¹⁰Ta yavona aqiaqiemi, nugweta Valegu Aqiaqina nayawala di'we qabuna 'idia, ta 'abiboda tuta ana 'ebel'uova na'ifoqe. ^{11y} Ta tuta~nana ina vetovolomi vetala'ai weaqina ge ona nuanua ma'oda ona vona 'aiqa, mana omi'a ge emi nuenuega ona vona, ta 'esi Yaubada Niboanina Gwalagwalana 'inega emi vona naneimi.

^{12z} "Ta wese tuta maimai 'idia tomotau edi gade gamonaya avia na'ifoqe. 'Inega taha 'oloto taina nasuluvea ta ina luve'aligia. Ta wese tama natuna nasuluvea ta ina luve'aligia. Wese gogama inadiavo be tamadiavo ina vevoalanedi ta ina awafeledi 'aliga 'inaya. ^{13a} Ta tomotau qabudi ina vevoalanemi mana omi'a agu to'abibodayavo. Ta tomeqabu ina tovoloi'ita ana laba tuta ana 'ebel'uova 'inaya yawai vataya ina lobe."

Vita qiduana

(Madiu 24:15-18; Luke 21:20-24)

^{14b} Wese leisu vonedi vonaya, "Tuta maimai 'inaya taha yani bwavubwavuna ana 'ita 'ebegaululu ina a'uya 'abaga Gwalagwalana 'inaya, ta 'abaga~nana ge daluaqiaqiei mana 'ebe'iwa'odu kavokavovo. (Ta tomeqabu ba'e vona~nana ina avoya luaqiaqiedi be nuadi na'eqa'uya ana alamani weaqina.) 'Inega Iudia ana tomotauyavo luaqiaqiedi be ina dena bwanagaya. ^{15c} Ta 'eguma taha toga selovaya toatoa nalukwayavoi nadena, ta ge nalugu 'evivi vanuea ena kulufa sabi 'ewana. ¹⁶Ta wese 'eguma taha toga vaoqaya fewafewa e ge na'evivi vanuea ana kwakwalufai sabi 'ewana. ^{17d} Tuta omo'e 'inaya vivine gamwegamwe'idi be tovesusuyavo nuakolokolodi.

¹⁸ "Ta ona venoqi Yaubada 'inaya ba'e vita diavona ge ina 'ifoqe guga'u ana tutaya, ^{19e} mana tuta ana 'ebeve'ale 'inega be ana laba tuta ba'e 'inaya ge taha wese vita 'idewana da'ifoqe. Ta 'abibodanaya vita ba'e 'idewani ge wese na'ifoqe 'evivi. ²⁰Vita omo'e ana tutaya 'eguma Yaubada

^x 13:9 Md 10:17-20 ^y 13:11 Lk 12:11-12 ^z 13:12 Md 10:21 ^a 13:13 Md 10:22; Ion 15:21

^b 13:14 Dan 9:27; 11:31; 12:11 ^c 13:15 Lk 17:31 ^d 13:17 Lk 23:29 ^e 13:19 Dan 12:1; Ve 7:14

ge nagivekusei nawale tomotau qabudi ina 'aliga. Ta Yaubada tuta~nana nagivekusea ena tomotau vevenua'ivinidi weaqidi.

²¹ “Ta tuta omo'e 'inaya 'eguma taha toga navoneu navonaya, 'U'itei, ba'e Keliso!” nage ‘Omo'e tauna!’ 'inega ena vona ge una vetumaqanei. ^{22f} Mana vaina tomotau 'e'eu'au'avidu ina vonaya, ‘Ya'a Keliso!’ ta wese ina vonaya, ‘Ya'a ba'e taugu tovesimasimana~nana!’ Taudi ve'ita 'ebenuavoqana ina viaqidi, ta 'eguma adi fata wese Yaubada ena tomotauyavo vevenua'ivinidi 'aqedi ina lihia. ²³ 'Inega ona 'itamaki aqiaqiemi! Ba'e yani diavona ni'a yamadusimanea 'imia be yaqisa to'eu'au'ava~dina ge ona vetumaqanedi.

Ieisu ena 'evivi mai weaqina
(Madiu 24:29-31; Luke 21:25-28)

^{24 g} “Tuta vitana nagumwala ta 'abiboda
vala navelovanea,

ta wai'ena ena simatala na'weu,
²⁵ ta 'wadi'wadima mahalega ina avuta,
ta wese yani qabuna waiwaidi mahalaya itoatoa
ina dedela.’

^{26h} “'Inega totoa bwa'obwa'oya ya'a Tomotau Natuna ina 'itegu gawatega ena mai me egu waiwai qiduana, ta wese me egu simatala aqiaqi otaqina. ²⁷ⁱ 'Inega egu tovale'ewayavo ena vetunedi be egu tomotau vevenua'ivinidi ina va'auqidi mahalega ta wese bwa'obwa'o ena di'we qabuna 'idiega.

'Ebevetalatutula mafa
(Madiu 24:32-35; Luke 21:29-33)

²⁸ “'Ebevetalatutula mafa 'inega ena ve'itemi. Tuta~nana mafa 'waena vauvaudi galugalu 'inega ni'a oalamanian tuta goyona ive ana tuta na'ifoqe. ²⁹ Ta wese 'eguma ba'e 'ebe'ita diavona ni'a yavonemi ina 'ifoqe 'imia, e 'inega ona alamanian ya'a tuta goyona ena 'evivi mai. ³⁰ Vonahaqiaqi, lagata ba'e ge ona 'aliga ana laba ba'e yani diavona ina 'ifoqe. ³¹ Mahala be bwa'obwa'o ina awala, ta ya'a egu vona ge taha ana tufwa 'idiega nahawala, ta 'esi na'eno vataya.

Ieisu ena 'evivi mai ana tuta ge taha toga dahalamanian
(Madiu 24:36-44)

³² “Ge taha toga dahalamanian totuta nage to'aubena 'inaya ena 'evivi ena mai, ta wese Yaubada ena tovale'ewayavo mahalaya ge ida alamanian, be wese ya'a Tomotau Natuna 'aubena~nana ge eda alamanian. Ta 'esi Tamagu ana 'aidega alahalamanian. ³³ 'Inega me emi 'iva'ava'ata ona toatoa ta ona 'itamakimi, mana egu tuta 'evivi ge oda alamanian.”

^f 13:22 Ve 13:13 ^g 13:24-25 Ais 13:10; Ioe 2:10,31; 3:15; Ve 6:12-13 ^h 13:26 Ve 1:7

ⁱ 13:27 Md 13:41

34^jInega Ieisu 'ebevetalatutula taha wese neidi vonaya, "Egu 'evivi mai kavona taha 'oloto kaikaiwabuna ena vanue nanogei ta natauya mali di'we 'inaya. Ta nugweta ena tofewayavo naluvinedi ta edi fewa navewila'ayedi be ena vanue ina 'itamakia. Ta wese vanue ana 'ebelugu ana to'itamaki vonea vonaya, 'Ge una 'eno, ta 'esi una vevekova!" 35^j Inega tuta qabuna ona 'itamakimi, mana ge oda alamania totutaya ena 'evivi mai, nage velovelovanaya nage tou gamonaya nage tuta~nana kamukamu idoudou nage manu bodobodoya. 36 Ge nuagu ona 'eno'eno ta ena luveafemi tuta nana ena mai. 37 Tola'ai yavonavonayedi 'imia wese 'idewani tomotau qabudi 'idia yavonedi yavonaya, 'Ona 'itamaki aqiaqiem!" "

Toluvineavo nuanuadi Ieisu ina luve'aligia
(Madiu 26:1-5; Luke 22:1-2; Ioni 11:45-53)

14 1^jAuvivia Sagalina ana 'ebenuave'avina ta wese Beledi ge ana isitimo Sagalina 'aubena magilafuna 'inaya nave'ale. 'Inega toveguba qiduquduadi be wese luvine ana tove'itayavo 'eda isalisalia ma'oda Ieisu ina u'vei ta ina kafia be ina luve'aligi, 2^a ta ivonaya, "Ge 'Auvivia Sagalina ana tutaya Ieisu kana kafia, mana nawale tomotau diadi navilea ta ina manini 'idaya."

Taha vavine dede'wega Ieisu iwaqia 'abaga Bedani 'inaya
(Madiu 26:6-13; Ioni 12:1-8)

3^k Ieisu 'abaga Bedani 'inaya toatoa iana Saimoni ena vanuea ta i'ai'ai. Ta Saimoni~nana igabea 'wago'wagoina, mana tauna lova to'wagota. 'Inega taha vavine mai lugu ta nimanaya dede'wa ma botolina viaviaqina alabasita 'inega kafikafia. Ta dede'wa~nana ana wawa nadi meilana aqiaqina ta ana ve'ia agona. 'Inega botoli~nana budona gibaia, ta dede'wa~nana 'inega Ieisu debana iwaqia.

4^a Ta vaina tomotau itoatoa vavine~nana ena viaqa i'itea ta diadi vilea ivonaya, "Tola'ai weaqina dede'wa iwaiwaqa kavokavovoi? 5^m Mana dede'wa~nana ana ve'ia qiduana, kavona taha 'oloto ena mane na'ewea ena fewa weaqina ya'wala 'aidegina 'inaya. Ta 'esi luaqiaqiea 'eguma dede'wa~nana kada vegimwaneyei be ana ve'ia qiduana kada 'ewei be lukwalukwadi 'idia kada vewila'ayea."

6^jInega Ieisu vonedi vonaya, "Ta'iwa olua'u, vavine ge ona givenuavitei mana yani aqiaqi otaqina viaqia 'iguya. 7^l Omi'a lukwalukwa~dina tuta qabuna maega otoatoa, ta totuta nuanuami ona iuledi e ami fata be ona iuledi. Ta ya'a ge tuta kuena omi'a maega kana toatoa. 8^m Ta vavine ba'e yani qiduana viaqia 'iguya tuta~nana 'wafigu dede'wega iwaqia, mana madu'iva'ava'aigu agu tavuna weaqina. 9^jYavona aqiaqiem, tuta~nana valegu

^j 13:35 Lk 12:38 ^k 14:3 Lk 7:37-38 ^l 14:7 Luve 15:11 ^m 14:8 Ion 19:40

ina lugaihiea di'we qabudi 'idia, e 'inega wese vavine ba'e ena viaqa 'iguya valena ina velulu'uyayea 'inega tomotau vavine~nana ina nuave'avinia."

Iudasa nuanuana Iesu nasuluvea

(Madiu 26:14-16; Luke 22:3-6)

¹⁰Inega Tuwelo~dina 'idiega taha ana wawa Iudasa Isakaliota tauya toveguba qiduquduadi 'idia nuanuana Iesu nasuluvea. ¹¹Ta Iudasa ena vona inoqolia 'inega iqaiawa qiduana ta ivona fofofola 'inaya ana ve'ia ina neia. 'Inega Iudasa tuta aqiaqina ba'eyea be Iesu nasuluvei ta ina kafia.

Iesu Tuwelo~dina maega 'Auvivia Sagalina 'abwagana i'ainia

(Madiu 26:17-25; Luke 22:7-14,21-23; Ioni 13:21-30)

¹² Beledi ge ana isitimo Sagalina ana 'aubena nugweta 'inaya me Diu sifi natudiavo lami ivunuqidi 'Auvivia Sagalina ana 'ebenuave'avina weaqina, mana edi ilivu 'idewana. 'Inega 'aubena~nana 'inaya Iesu ana to'abibodayavo imai ivetala'aiea ivonaya, "Ma'inaya 'Auvivia Sagalina ana 'abwaga ana 'iva'ava'aia weaqiu be una 'ai?"

¹³ 'Inega Iesu ana to'abiboda magilafudi luvetunedi ta vonedia, "Ona tauya Ielusalema 'inaya ta taha 'oloto ona 'itea go'ila ana 'ebegoi kayokayo 'avalea, e tauna ona 'abibodea! ¹⁴ Ta 'oloto~nana maega ona lugu vanuea, be tonivanue ona voneaya, 'Ema Tove'ita noqinoqi 'iuya vonaya, "Tosifaufa una awafelea 'iguya be yaqisa 'inaya agu to'abibodayavo maega 'Auvivia Sagalina ana 'abwaga ana 'ai?" ' ¹⁵ Be 'inega sifaufa qiduana ulawanaya nave'itemi tawa 'i'iva'ava'aina. Ta omo'e 'inaya ada 'abwaga ona 'iva'ava'aia weaqida."

¹⁶ 'Inega ana to'abibodayavo magilafudi itauya ilugu Ielusalema, ta yani qabuna Iesu ni'a vonedia 'idewana ilobedi. 'Inega 'Auvivia Sagalina ana 'abwaga i'iva'ava'aia weaqina.

¹⁷ Ni'a velavilaviea 'inega Iesu taudi Tuwelo~dina maega ilugu sifaufa~nana 'inaya. ¹⁸ Ta itoabui i'ai'ai 'inega vonedi vonaya, "Yavona aqiaqiemi, nawale taha 'imiega maega ka'ai'ai naneiegu agu aviayavo 'idia."

¹⁹ 'Inega Iesu ena vona weaqina nuadi vita, ta 'aidega 'aidega Iesu ivetala'aiea ivonaya, "Kaiwabu, ya'a gebu, waisa?"

²⁰ 'Inega Iesu vona 'eviviedi vonaya, "Agu tosuluva omi'a Tuwelo~mina 'imiega. Tauna nawale ya'a maega gaeba 'aideganega beledi ana 'aubwa'ui ana 'ai. ²¹ Ta ya'a Tomotau Natuna ena tauya 'edana 'inega lova Buki Nugwenugweina 'inaya madusimanea. Ta agu tosuluva~nana nuakolokolona, mana nawale veilae qiduana nalobe, ta luaqiaqiea 'eguma lova inana ge ida venatunei."

ⁿ 14:12 'Ifa 12:6 ^o 14:18 Same 41:9

Kaiwabu ena 'ai*(Madiu 26:26-30; Luke 22:14-20; 1 Kolinita 11:23-25)*

22 Tutana nawale i'ai'ai 'inega Ieisu beledi 'ewei ta vona lukaiwa Yaubada 'inaya, 'inega gitomwei ta ana to'abibodayavo neidi ta vonedia, "Ba'e 'wafigu ta ona 'ewei ona 'ai!" 23 'Abibodanaya 'oine ma vedina 'ewei e 'inega wese lukaiwa ta neidi be qabudi inumea, 24^p ta Ieisu vonedia, "Ba'e sulaligu nainoqa tomotau qabumi weaqimi, ta wese ba'ena luvine vauvauna ana 'ebeve'ale. 25 Yavona aqiaqi 'imia, tuta ba'e 'inega ta 'abiboda ge wese 'oine vuaqina 'inega ena numa 'eviviei ana laba 'oine vauvauna ena numea Yaubada ena 'Ebeluvine 'inaya."

26 'Ai gumwala 'inega 'evosi taha i'evosiei ta i'ifoqe, 'inega i'watovu bwanaga Olibe 'inaya.

Ieisu vona 'ifoqe ana vegeqa weaqina*(Madiu 26:31-35; Luke 22:31-34; Ioni 13:36-38)*

27^q 'Inega Ieisu ana to'abibodayavo vonedia,

"Nawale emi vetumaqana 'iguya nabe'u

'idewana Buki Nugwenugweina

ena simana vonaya,

'To'itamaki sifi ena luve'aligia

ta ena sifiavo ina yavula dadana.'

28^r Ta egu ya'itoto 'evivi 'abibodanaya Galili 'inaya ena nugweta, ta omi'a 'abibodaguyega ona wai."

29 'Inega Fita vonaya, "Eguma nawale qabudi 'iuyega ina dena ta ya'a agu 'aidegana ge ena dena."

30 'Inega Ieisu vona 'eviviea vonaya, "Vonahaqiaqi, o'a ba'itaga velovelovanaya tuta toi una maduvegeqegu, ta 'abiboda kamukamu ena dou navemagilafuya."

31^s Ta Fita bonana falafalanega voneaya, "Ge ana fata ena vegeqeu! 'Eguma ina luve'aligiu ya'a wese maega ina luve'aligigu." 'Inega to'abiboda qabudi wese 'idewani ivona 'aiqa.

Ieisu vevenoqi Gedesemani 'inaya*(Madiu 26:36-46; Luke 22:39-46)*

32^t 'Inega Ieisu ma ana to'abibodayavo itauya taha di'we ana wawa Gedesemani 'inaya, ta vonedia, "Ba'idia ona toatoa ta ya'a ena venoqi Yaubada 'inaya." 33 'Inega Ieisu enavo Fita be, Iemesa ta wese Ioni 'ebe'ewedi itauya, ta me ena giwali visiq a be me ena nuavita vonedia, 34^u

^p 14:24 'Ifo 24:8; Sek 9:11; Iel 31:31-34; 1Kol 10:16; Ibe 9:20 ^q 14:27 Sek 13:7

^r 14:28 Md 28:16; Mk 16:7 ^s 14:31 Ion 11:16 ^t 14:32 Ion 18:1 ^u 14:34 Ion 12:27

“Giwaligu visivisiqa qiduana, ta agu lutonova kavona tuta goyona ena 'aliga. 'Inega ba'idia ona toatoa ta ona vevekova.”

³⁵'Inega Iesu tufwana vanaqo givelukabwebwe ta vevenoqi 'eguma ana fata visiq ba'e Yaubada da'ewa yavulei ta vonaya, ³⁶“Tamagu ye, yani qabuna au fata, 'inega visiq vedina ba'e 'iguyega una 'ewa yavulea. Ta ge ya'a egu nuenuega ta 'esi o'a eu nuanua una viaqia.”

³⁷'Inega 'evivi mai toidi 'idia ta 'itedi i'eno motaiva ta Iesu Fita divanoya voneaya, “Saimoni, ma'oda 'inega u'eno'eno, nage ge au fata tuta kukusana namo uda toatoa ta uda vevekova, waisa?” ³⁸Ta Iesu toidi vonedia, “Ona 'itamakimi be yaqisa matami ge nadune ta ona vevenoqi, fole Seitani nasitonovimi. Niboanimi nuanuana fewa aqiaqina naviaqia, ta 'wafimi me ena dawalili.”

³⁹'Inega Iesu wese vanaqo ta ena venoqi Yaubada 'inaya lu'eviviea. ⁴⁰'Inega 'evivi mai ana to'abibodayavo 'idia ta wese lobedi i'eno nuafani mana matadi dune fanifani. 'Inega Iesu divanodi, ta ge taha tola'ai ida vonei.

⁴¹Ta tuta vetoina Iesu wese 'evivi naqo sabi venoqi, 'inega 'evivi mai ta wese lobedi i'eno nuafani i'eno'eno ta vonedia, “Ma'oda nawale o'eno'eno ta oveveyawai, waisa? Ta'iwa, ta ya'a Tomotau Natuna egu tuta ni'a 'ifoqe be ina ve'ineiegu tomotau luveifadi nimadia. ⁴²Oya'itoto kawai, agu tosoluva ni'a 'ifoqe maimai.”

Iesu ana kafi weaqina

(Madiu 26:47-56; Luke 22:47-53; Ioni 18:3-12)

⁴³Iesu nawale vonavona 'inega Iudasa va'ifoqe mai, tauna taha to'abiboda Tuwelo~dina 'idiega. Ta toveguba qiduquadi be luvine ana tove'itayavo ta wese 'abaga ana tovanugwetayavo qabu qiduana iluvetunedi Iudasa maega imai Iesu sabi kafina. Ta qabudi me edi kefata ta wese me edi gita imai.

⁴⁴Ta Iudasa lova toluavia 'ebe'ita taha weaqina ni'a vonedi vonaya, “Taha 'oloto ena talafafea, e bena'e tauna Iesu, 'inega ona kafia ona 'itamakia ta ona tauyea.” ⁴⁵'Inega tauya tunutunuqina Iesu 'inaya voneaya, “Tove'ita!” 'abo talafafea. ⁴⁶'Inega qabu~dina i'ifoqe mai ta Iesu ikafia. ⁴⁷'Inega taha 'oloto Iesu ena qabu 'inega di'wenaya tovtovolo ta ena kefata siwaia ta toveguba edi tovanugweta ena tofewa teniqana talayo'ea.

⁴⁸'Inega Iesu qabu~dina vonedia, “Ma'oda, nage ya'a tovanawala taha, 'inega me emi kefata be me emi gita omai ona kafigu? ⁴⁹” Tola'ai weaqina ge oda kafigu tutana nuanimia yatoatoa ta yaveve'ita qabu 'idia Vanue Gwalagwalana 'atamaninaya? Ta tola'ai lova tovesimasimana ivona

° 14:36 Mk 10:38; Ion 6:38 ° 14:49 Lk 19:47; 21:37; Ion 18:20

fofofolea Buki Nugwenugweina 'inaya ana aqiaqi ba'itagana 'ifo'ifoqe emi viaqayavo 'idiega."

50^x 'Inega Iesu ana to'abibodayavo qabudi idena iyavula.

51 Ta taha kilakai toluaviayavo i'itea, tauna wese Iesu ana to'abiboda taha. Nuanuadi ina kafia ta ana kaleko 'aidega otaqina, 52 'inega tuta~nana igi'waqiea e ana kalekomo ilih mwainia, 'inega ma'igonegonena dena tauya.

Iesu ivetovoloya kaniselayavo 'iawadia

(Madiu 26:57-68; Luke 22:54-55,63-71; Ioni 18:13-14,19-24)

53 'Inega Iesu itauyea toveguba qiduana ena 'abaga 'inaya ta ilugu. Ta toveguba edi tovanugweta be 'abaga ana tovanugwetayavo ta wese luvine ana tove'itayavo ni'a iva'uta itoatoa. 54 Ta Fita tufwana luluvaiega Iesu tala'obea 'inega wese lugu toveguba~nana ena 'abagaya. Ta Fita 'ebevekotu 'atamaninaya toabui 'abaga ana to'itamakiavo maega ta 'aiwea ivevetaluvala.

55 Ta toveguba qiduiduadi be me Diu edi kaniselayavo qabudi nuanuadi Iesu ana 'ebeve'ewa ina salia 'inega ana fata ina luve'aligia, ta ge taha ena luveifana ida lobei. 56 Tomotau qabudi Iesu iveve'ewea ta edi vona ge dave'aidega mana qabudi iu'au'ava.

57 'Inega vaina itovolo ta Iesu u'avega ive'ewea ivonaya, 58^y "Iesu ena vona anoqolia vonaya, 'Vanue Gwalagwalana ba'ena tomotau iyoqonia nawale ena qeu yavulea, ta 'aubena toi 'abibodanaya wese taha vanue gwalagwalana ena yoqona 'eviviea, ta ge tomotau nimadiega.'" 59 Ta taudi wese edi vona ba'e yani~nana weaqina ge dave'aidega.

60 'Inega toveguba edi tovanugweta toluvineavo matadia ya'itoto ta Iesu vetala'aiea vonaya, "Tomotau omo'e edi ve'ewa 'iuya ni'a unoqolia, waisa? Tola'ai weaqina ge uda vona 'eviviedi?" 61 Ta Iesu nuanamo gado.

'Inega wese toveguba edi tovanugweta vetala'ai 'eviviea vonaya, "Nage o'a To'etoyavuauna Yaubada Gwalagwalana Natuna, nage gebu?"

62 'Inega Iesu voneaya, "Ya'a ba'e taugu. Nawale ya'a Tomotau Natuna ona 'itegu Tovewaiwai Otaqa ana 'ataqia ena toabui be wese mahala gawainavo debanega ena 'evivi mai."

63-64^z 'Inega toveguba edi tovanugweta diana vilea ta taunega ana kaleko siabui ta vonaya, "Ena vona luveifa ni'a onoqolia. 'Oloto ba'e ena vona 'inega taunega givaneyea 'idewana tauna Yaubada! Ta'iwa, ge taha wese tove'ewa edi simana kana noqoli ena luveifana weaqina."

'Inega qabudi 'elagaidi ivonaya, "Luaqiaqiea be na'aliga!"

65 'Inega vaina Iesu igida'wei ta matana kalekoyega i'afwalia ta nimadiega ilavua dadanea ivonaya, "Eguma o'a tovesimasimana taha

^x 14:50 Same 31:11 ^y 14:58 Ion 2:19-21 ^z 14:63-64 Luvi 24:16; Ion 19:7

e 'inega usimana toga vunuvunuqiu!" 'Inega ana to'itamakiavo ikafia ta ivunuqa dadanea.

Fita ena vegeqa Iesu weaqina

(Madiu 26:69-75; Luke 22:56-62; Ioni 18:15-18,25-27)

⁶⁶Ta Fita nawale 'abaga gamonaya toatoa, 'inega toveguba edi tovanugweta ena tofewayavo 'idiega taha iahaba 'ifoqe mai. ⁶⁷'Inega iahabana Fita 'itea 'aiwea vevetaluvala ta 'ita makimakia voneaya, "O'a wese Nasaleta 'olotona Iesu maega otoatoa."

⁶⁸'Inega Fita vegeqa vonaya, "Yani bena'e uvonevonea ya'a ge eda alamanial!" 'Inega Fita dena 'ifoqe 'abaga ana 'ali 'awanaya.

⁶⁹'Inega wese iahaba~nana Fita 'itei ta tomotau di'wenaya itoatoa vonedi vonaya, "Omo'e 'oloto~nana tauna wese Iesu ana qabu 'idiega."

⁷⁰'Inega Fita wese vegeqa vonaya, "Ya'a gebu!"

Ta tuta kusakusana 'abibodanaya taudi Fita di'wenaya itoatoa ivoneaya, "Vonahaqiaqi, ni'a ahalamaniu o'a wese Iesu ana to'abiboda taha mana o'a Galili 'olotou!"

⁷¹'Inega Fita ve'ale 'awatamatamana gaba vane vonaya, "Tamada, 'oloto~nana ovonevonea ya'a ge wese eda alamanial!"

⁷²Ta tuta omo'e 'inaya kamukamu ena dou vemagilafuna. 'Inega Fita Iesu ena vona nuaia vonaya, "O'a tuta toi una maduvegeqegu ta 'abiboda kamukamu ena dou navemagilafuya." 'Inega Fita nuana vita qiduana ta dou.

Iesu imiea gavana Failato 'inaya

(Madiu 27:1-2,11-14; Luke 23:1-5; Ioni 18:28-38)

15 ^{1a} Manu bodobodoya toveguba qiduqiduadi be 'abaga ana tovanugwetayavo be luvine ana tove'itayavo ta wese kanisela qabudi itoa va'auta iveveqae Iesu weaqina. Veqae gumwala, 'inega edi nuanua 'aideganega luvine ia'uya ta Iesu nimana iyoqonia itauyei ta ineiea me Loma edi gavana Failato nimanaya, tauna di'we Iudia ana toluvine.

²'Inega Failato Iesu vetala'aiea vonaya, "Nage o'a me Diu edi Kini?"

Ta Iesu ve'iea vonaya, "Ni'a uvona 'idewana."

³Ta toveguba qiduqiduadi Iesu ive'ewea yani taha taha 'idiega. ⁴'Inega wese Failato Iesu vetala'aiea vonaya, "Tomotau ba'e yani 'eala weaqidi ive'eweu, ta tola'ai weaqina ge uda vona ve'iedi?"

^{5b} Ta tua Iesu edi ve'ewayavo 'inaya ge taha tuta dave'iedi, 'inega Failato nuana voqana agona.

^a 15:1 Lk 22:66 ^b 15:5 Ais 53:7; Mk 14:61

Failato Ieisu awafelea ina luve'aligia
(Madiu 27:15-26; Luke 23:13-25; Ioni 18:39–19:16)

⁶Ya'wala 'aidega 'aidega 'Auvivia Sagalina ana tuta 'inaya di'we Iudia ana gavana ena ilivu ba'e 'idewana. Vanue 'ebeyoqonega taha 'oloto nayavuia na'ifoqe tomotau edi nuanua 'inega. ⁷Tutana 'inaya toluve'aliga taha ana wawa Balabasi ma enavo itoatoa vanue 'ebeyoqona gamonaya. Taudi ge nuadi me Loma ina luvinedi, 'inega lova vaina ifofolidi. 'Inega luvine ni'a ilobea luve'aliga weaqina.

⁸'Inega tomotau qabudi iva'auta imai gavana Failato 'inaya ta ivoneaya, "Taha 'oloto una yavuia 'imaya vanue 'ebeyoqona 'inega 'idewana ya'wala 'aidega 'aidega uviaviaqa 'aiqa, waisa?"

⁹'Inega Failato vonedia, "Nage nuanuami me Diu edi Kini ena 'etoyavuia 'imia?" ¹⁰Failato ena vetala'ai 'idia 'idewana mana ni'a alamania toveguba qiduquidua Ieisu ive'ifi'ifiea 'inega nuanuadi ina luve'aligia. ¹¹^c Ta toveguba qiduquidua tomotau qabudi nuadi igiqa'uya, mana nuanuadi Balabasi ina 'inanea, ta Ieisu gebu.

¹²'Inega Failato tomotau qabudi vetala'aiedi vonaya, "Ta 'eguma Balabasi ena 'etoyavuia 'imia, 'inega ma'oda ena viaqa 'aiqa tauna ogabea me Diu edi Kini weaqina?"

¹³Ta qabudi igaba vane ivonaya, "'Etoluai 'inaya una tutuve'ewea!"

¹⁴'Inega wese Failato vetala'aiedi vonaya, "Tola'ai ena luveifana?"

'Inega wese igaba vane ta bonadi agonega ivonaya, "Una tutuve'ewea, una tutuve'ewea!"

¹⁵'Inega Failato tomotau adi giveqaiawa weaqina Balabasi yavuia 'idia. Ta ena luvineyega Ieisu wayo metametanega ivunuqa dadanea, ta 'abiboda Failato ve'ineia me Loma toluaviayavo 'idia sabi tutuve'ewana.

Toluaviayavo Ieisu igivenu'wea
(Madiu 27:27-31; Ioni 19:2-3)

¹⁶'Inega toluaviayavo Ieisu itauyea edi vanue 'ebetoava'auta 'inaya gavana Failato ena 'abaga qiduana gamonaya, ta ediavo qabudi igaba va'auqidi imai. ¹⁷'Inega taha kaleko kuena qimwaqimwalina 'inega Ieisu ivekalekoya, ta wese ana biatuli talitaliega iviaqia ta 'unu'ununaya ia'uya. ¹⁸Ta givenu'wega i'amayabea ivonaya, "Kaiwa, kaiwa me Diu edi Kini!" ¹⁹Ta 'abiega ana kiaya ilavulavua ta wese i'egidagida'wea. Be wese tuqatuqadiega isobadi ta givenu'wega ihiwa'odu 'inaya. ²⁰Tuta~nana Ieisu igivenu'wea gumwala, 'inega kaleko qimwaqimwalina i'ewa yavulei ta tauna ana kalekoyega ivekaleko 'eviviea. Ta 'inega i'ewa 'ifoqeyea itauyea sabi tutuve'ewana.

^c 15:11 Via 3:13-14

Ieisu itutuve'ewea 'etoluai 'inaya

(Madiu 27:32-44; Luke 23:26-43; Ioni 19:17-27)

21^d Tutana itautauya 'edaya 'inega taha Sailini 'olotona ilobea maimai ena 'abagega Ielusalema 'inaya. Ana wawa Saimoni, tauna Alekisana be Lufoso tamadi. Ta toluavia~dina iluvetunea Ieisu ana 'etoluai na'avalea. 22 'Inega Ieisu itauyea taha 'abaga ana wawa Goligota 'inaya, ta wawa~nana ana alamani "Unu'unu ana 'abaga". 23 'Inega 'oine be mulo maega iwayavilea ta Ieisu ineia vonigo danuma be yaqisa ge yuvaqa qiduana nalutonovi, ta Ieisu noga.

24-25^e Tuta~nana Ieisu itutuve'ewea baba'au ni'a vane mai 9 koloki 'inaya. Ta ana kalekoyavo ana 'ewa weaqina taha laha iviaqia ina 'itea togama tokaleko na'ewea. 26 Ta ana 'etoluai debanaya ana ve'ewa 'iuna i'wayavia vonaya, "BA'E ME DIU EDI KINI." 27-28^f Ta wese toluveifana magilafudi Ieisu maega itutuve'ewedi taha ana 'ataqiega, ta taha ana keliega.

29^g Tomotau ivevedelideli ta iveve'unulewalewa be idagidagi ta wese Ieisu igigivenu'wea ivonaya, "Ei nuakolokolou! Uvonaya vonigo Vanue Gwalagwalana una qeu yavulei ta 'aubena toi 'inaya wese una yoqona 'eviviea. 30 'Inega tau'uyega u'etoyavuii ta 'etoluaiega uwebui mai!"

31 Ta wese 'idewani toveguba qidudidua be luvine ana tove'itayavo Ieisu igivenu'wea ta nuanidia ivonaya, "Ma'oda tauna mali tomtau 'etoyavuidi ta taunega ge ana fata na'etoyavui. 32 Tauna vonea To'etoyavua ta di'we Isileli ana Kini, ta 'eguma 'etoluai 'inega dawebui mai kada 'itea kada vetumaqanea."

Ta toluveifana magilafudina Ieisu maega itutuve'ewedi e taudi wese 'idewana Ieisu igivenu'wea.

Ieisu ena 'aliga

(Madiu 27:45-56; Luke 23:44-49; Ioni 19:28-30)

33 Baba'auyega be lavilavi 3 koloki 'inaya bwa'obwa'o qabuna velovana bodea. 34^h Ta omo'e tuta~nana 'inaya Ieisu bonana qiduanega gaba vonaya, "Eloi, Eloi, lama sabakitani?", ta ana alamani, "Egu Yaubada, egu Yaubada, tola'ai weaqina unogenogegu?"

35 Ta vaina tomtau di'wenaya itovotovolo ena gaba inoqolia ivonaya, "Onoqoli, Ilaitia gabegabea!"

36ⁱ 'Inega taha 'oloto vihila tauya kikifa 'ewei ta 'oine yuyuna 'inaya 'aubwa'ui 'inega taha 'aiwe 'inaya 'idawayei e ve'etovaneyea Ieisu 'awanaya be datomwase'u'uya. 'Inega 'oloto~nana vonaya, "Tua 'etobala, ta ka'itei 'eguma Ilaitia namai ta 'etoluaiega na'etoyavui."

^d 15:21 Lom 16:13 ^e 15:24-25 Same 22:18 ^f 15:27-28 Ais 53:12 ^g 15:29 Same 22:7; 109:25; Mk 14:58 ^h 15:34 Same 22:1 ⁱ 15:36 Same 69:21

³⁷Inega Ieisu wese bonana qiduanega gaba ta yawaina gumwala.
³⁸Ta tuta~nana 'inaya Vanue Gwalagwalana ana bagina kaleko eabu magilafuyea debanega be webui 'ayanaya. ³⁹Toluaviayavo adi tovmatana Ieisu 'iawanaya tovtovolo, ta tuta~nana 'itea ma'oda 'aliga 'aiqa 'inega vonaya, "Vonahaqiaqi, 'oloto ba'ena Yaubada Natuna."

⁴⁰⁻⁴¹^j Vivine tufwana qabudi lova di'we Galili 'inaya Ieisu i'abibodea ta ihiulea, ta taudina wese Ieisu maega ni'a i'watovu mai Ielusalema 'inaya. Ta ba'e qabu~dina gamodia Meli Magidala ta wese waviana Meli, taudi Iemesa be Iosese inadi ta wese Salome. Ta vivine diavona tufwana luluvaiega itovolo ta ivevekova naqo, ta yani qabuna Ieisu 'inaya 'ifoqe i'itea.

Ieisu ana tavuna weaqina

(Madiu 27:57-61; Luke 23:50-56; Ioni 19:38-42)

⁴²⁻⁴³'Aubena~nana Ieisu itutuve'ewea me Diu igabea 'aubena 'ebe'iva'ava'ta, mana navulihia 'inega Sabate na'ifoqe. 'Inega lavilavi 'inaya taha Alimatia 'olotona ana wawa Iosefa 'ifoqe mai. Tauna me Diu edi toluvine agona taha, ta Yaubada ena 'Ebeluvine weaqina ba'eba'eyea. Ta me ena giwalifatu 'ifoqe tauya gavana Failato 'iawanaya ta venoqiea Ieisu 'wafina weaqina. ⁴⁴Tuta~nana Failato Iosefa ena noqi noqolia 'inega nuana voqana, ta vonaya, "Oo, nage Ieisu ni'a 'aliga?"

'Inega Failato toluavia adi tovmatana gabea 'ifoqe mai ta vetala'aiea vonaya, "Ma'oda, nage Ieisu ni'a 'aliga?"

⁴⁵Ta 'oloto~nana vona ve'iea vonaya, "Edewani".

'Inega Failato Iosefa awafela 'inaya be Ieisu 'wafina na'ewea. ⁴⁶'Inega Iosefa kaleko wadawadaeana gimwaneana miea, ta Ieisu 'wafina 'ewa webuiea 'etoluaiega 'abo kaleko~nana 'inega umea. Lova deba'unu taha ialea kavona vatu'ubu dabo qiduana gamonaya, 'inega ba'e deba'unu~nana 'inaya Iosefa Ieisu 'wafina a'uya. Gumwala, 'inega dabo qiduanega deba'unu 'awana 'aubodea. ⁴⁷Ta Meli Magidala ma waviana Meli taudi Iosese inana ivevekova, ta ma'inaya Ieisu 'wafina a'uya i'itea.

Ieisu ena ya'itoto 'evivi 'aligega

(Madiu 28:1-8; Luke 24:1-12; Ioni 20:1-10)

16 ¹Sabate ni'a gumwala, 'inega Meli Magidala be waviana Meli Iemesa inana, ta wese Salome maega dede'wa meilana aqiaqina igimwaneana, mana nuanuadi Ieisu 'wafina ina vedede'wea. ²'Inega baba'au ena yayaqa 'unu 'awa'awai otaqaya wiki ana 'aubena 'ebeve'ale 'inaya vivine~dina me edi dede'wa itauya Ieisu ana deba'unuya.

³Nawale 'edaya itautauya ta taudimo iveveqae ivonaya, "Togama naiuleda be dabo qiduana nabuini deba'unu 'awanega?"

^j 15:40-41 Lk 8:2-3

⁴Ta tutana i'ita naqo 'inega deba'unu~nana ana dabo qidwana i'itea buibui naqona. ⁵'Inega ilugu deba'unu~nana gamonaya ta adi 'ataqia taha kilakai i'itea toatoa ma ana kaleko kuena ta wadawadaea otaqina, 'inega imwaniniva veiveifa.

⁶Ta kilakai~nana vonedi vonaya, "Ge ona mwaniniva! Ieisu Nasaleta 'olotona itutuve'ewea 'etoluai 'inaya osalisalia. Tauna gebu ba'idia datoatoa, ta 'esi ni'a ya'itoto 'evivi 'aligega. O'itei, ba'idia 'wafina ia'uya, ta ba'itagana gebu'ena. ^{7k} Ta omi'a ona tauya Fita ta wese to'abiboda qabudi 'idia ta ona vonedia, 'Ieisu nugwenugweta Galili 'inaya, omo'e 'inaya ona 'itea, lova ena vona 'imia 'idewana.' "

⁸'Inega vivine~dina me edi mwaniniva ta wese me edi nuavoqana i'ifoqe idena deba'unuyega. Ta 'edaye ge taha toga ida vonei, mana imwaniniva gegoyo.

Ieisu ena 'ifoqe Meli 'inaya
(Madiu 28:9-10; Ioni 20:11-18)

⁹[Tuta~nana Ieisu ya'itoto 'evivi 'awa'awai otaqaya wiki ana 'aubena 'ebeve'ale 'inaya, e 'inega madu'ifoqe Meli Magidala 'inaya. Lova Ieisu niboana luveifadi seveni adi yau 'wavi 'ifoqeyedi ba'e vavine~nana 'inega.

¹⁰'Inega Meli tauya Ieisu ana to'abibodayavo 'idia ta vematamagilafuyedi. Ta taudi nawale me edi nuavita ta wese me edi dou Ieisu weaqina itoatoa. ¹¹Ta Meli vonedi vonaya, "Ieisu mayawaina toatoa, ni'a ya'itea!" Ta ena vona ge ida vetumaqanei.

Ieisu ana to'abibodayavo magilafudi maega 'edaye iveloba
(Luke 24:13-35)

¹²Ta 'abiboda wese Ieisu 'ifoqe ana to'abiboda magilafudi 'idia. Taudi Ielusalemege ni'a i'ifoqe itautauya mali di'we 'inaya. Ta tutana Ieisu 'ifoqe 'idia ivemwageyea mana ana 'ita vedumaduma. ¹³Nawale itautauya, 'inega nuadi 'eqa'uya vonigo tauna edi Kaiwabu, e 'inega lukwayavonega i'evivi ediavo 'idia ta ivematamagilafuyedi. Ta edi simana 'idia ge taha toga davetumaqanei.

Ieisu ana to'abibodayavo edi fewa neidi
(Madiu 28:16-20; Luke 24:36-49; Ioni 20:19-23; Viaqa 1:6-8)

^{14l} 'Abibodanaya Ieisu ana to'abibodayavo leveni i'ai'ai ta 'ifoqe 'idia. 'Inega lugwaeyedi edi vedeba i'wana weaqina, vonedi vonaya, "Eguma taudi egu tovolu 'evivi 'abibodanaya ni'a i'itegu ta ivematamagilafuyemi, 'inega tola'ai weaqina ge oda vetumaqanedi?"

^{15m} 'Inega Ieisu luvine neidi vonedia, "Omi'a ona tauya di'we qabuna 'idia ta Vale Aqiaqina ona lugaihiea tomotau qabudi 'idia. ¹⁶ⁿ

^k 16:7 Md 26:32; Mk 14:28 ^l 16:14 1Kol 15:5 ^m 16:15 Via 1:8 ⁿ 16:16 Via 2:38

Ta tomeqabu ina vetumaqanegu e ona givebabitaísodi, 'inega nawale 'etoyavua ina lobeá. Ta tomeqabu ge nuanuadi ina vetumaqanegu nawale ve'ia vitana ina lobeá.

17^o “Ta agu tovetumaqanayavo 'ebe'ita waiwaidi ina viaqidi. 'Inega agu wawega niboana luveifadi ina 'wavi 'ifoqeyedi tomotau 'idiega, ta wese adi fata bona vauvauna ina alamanía ta ina veqaeýea. 18^p Ta adi fata mwata ina kafidi ta ge ina veiláqe, ta 'eguma go'ila badabadana ina numea 'inega ge ina 'aliga. Be wese toveviihiqayavo nimadiega ina gitonovidí ta ina veaqiaqi.”

Ieisu vaneqa mahalaya
(*Luke 24:50-53; Viaqa 1:9-11*)

19^q Kaiwabu Ieisu ena vona lu'ovoia 'idia, 'inega Yaubada 'ebe'ewea vaneqa mahalaya, ta Tamana ana 'ataqia toabui. 20^r 'Inega ana to'abibodayavo itauya di'we taha taha 'idia ta Vale Aqiaqina ilugaihiea tomotau 'idia. Ta Kaiwabu edi lugaihi 'awahaqiaqiea 'inega ena waiwaiega wese viaqa 'ebenuavoqana ta waiwaidi iviaviaqidi.]^s

^o 16:17 Via 2:4; 8:7 ^p 16:18 Lk 10:19; Via 28:3-6 ^q 16:19 Via 1:9-11; 2:33-34
^r 16:20 Via 14:3; Ibe 2:3-4 ^s 16:20 Ba'e buki~nana da'a 16 be laba 9-20 'idia vaidi leta nugwenugweidi adi to'wayaviavo ge ida 'wayavidi. 'Inega vaidi toalamani ivonaya be nage ge Maki taunega laba diavona da'wayavidi, ta 'esi 'abibodanaya vaina to'wayavi taudi edi nuenuega ia'udi.